

南歸草

姚華曾著



序

乙亥冬龍眠姚太史華曾服闋來京師就邸第
相見勞問外隨出南歸詩如千篇示余且屬一言
弁之簡余受而讀之竊歎其詩之工已迺不禁忽
忽感生也先是華曾尊人羹湖先生執經余先殿
撰公門以文章道義相切劘歲已亥先伯兄秋屏
又復與羹湖公同提南宮兩家誼益篤爰申婚媾
之約而華曾長君孔鈇乃壻於秋屏兄以故龍眠
距毘陵大江上下千餘里而姚與楊之好特厚者
所從來實遠云余少時侍殿撰公側識羹湖公已



1918 G

2 NOV 1950

而交華曾兄弟虛槎意氣慷爽傾一世而華曾弘才俊品聲藉藉公卿間羹湖公旣宦成尤屬望兩公子成立而虛槎華曾至性皆孝友憶己未羹湖公喬梓偕遊長安與余寓舍相望三載流連文酒過從之餘無間晨夕未嘗不私美姚氏天倫之篤也無何羹湖公歸臥黃柏山房虛槎尋倅閩中華會以戊辰名魁讀書中秘伯仲各宦南北瞻雲陟岵之思無時去諸懷也壬申春華曾假歸省覲羹湖公顧見色喜甚躬侍湯藥依依孺慕無少間訖羹湖公捐館華曾哀毀過情若深幸夫假旋得一

覲其親而又以親去之速且不及待虛槎一見之爲至痛也者此南歸之詩之所以志也嗚呼余年纔二十遽罹先殿撰公之變比壯幸邀一第濫厠木天迨辛酉請假返里門會秋屏兄擢任外臺卽山左省之忽抱鵠原之痛顧瞻罔極風木轉恫以視姚氏一堂離離睦睦福備五倫直如天上人樂則余今讀南歸諸什也烏能毋重感矣乎華曾詩和厚深穩源出三百體製則衷之六朝唐宋諸家而莫名其一勝蓋本諸家法爲多余惟向亦嘗志於斯矣齒髮就衰學殖荒落皮筆頽唐不復省撚

髭叉手爲何事亦安能序華曾詩哉且華曾詩弗
藉余言傳茲獨不能已已者固以其詩之工而感
余者深也是集也華曾嘗遊楚遊吳遊越渡仙霞
過芝山撫先人棠蔭愴念舊遊賦詩十章以志痛
他若所遇不一人所紀非一事登覽贈酬時有之
并系之曰南歸云皆

康熙歲次丙子端月年姻世弟楊大鶴拜手題於
京邸之借樗居

序

凡人之仕宦以翰苑爲榮蓋內外大小之官各有
所司而官翰苑者獨以文章爲職業讀書學古以
經術經世而因其餘閒以肆力風雅發爲篇章亦
足鼓吹休明潤色鴻業然而不愧於其官者固已
少矣同年姚華曾先生龍眠望族家世貴盛尊君
經三先生爲名進士歷任廉白投効早歸杜門課
子華曾濡染家學蜚聲騰實射策甲科

天子臨軒簡擢俾入中秘華曾在邸舍垂簾下帷橫
經籍書惟以著述爲務名章秀句傳誦一時斯可

謂不愧於其官者矣會

天子念詞林遷轉淹滯特命通補卿寺諸官則取徑捷速人爭趨之華會以器業聞望預在選中顧念其尊君先生年老陳情乞歸所親勸其少留以需後命華會弗顧也歸侍太公者經年而有風木之痛服闋之後扁舟襍被尋訪浙閩諸山水至其大父及尊君所宦遊處爲之悄然而悲慨然而歎有望雲之思陟岵之感焉古之風人必本乎性情原乎孝悌如華會者始可以爲詩人始可以爲孝子已矣乙亥冬華會至都携其南歸草畧予見其舍

英咀華金春玉應深厚雄傑之氣隱然行墨之外非世之剽竊采掇者所能涉其籬藩闖其潭奧也予戊辰諸同年類多恢闊博雅之士而史館諸君子皆極一時之選予竊嘗誇示於人以爲與有榮施焉然器識凝重學有根原春華秋實兼而有之鮮有如華會者予嘗私論同年史館諸君其能樹駿烈而躋大位者必華會也華會德行內完而才華外朗其學不盡於詩卽其詩亦不盡於南歸之一集然卽是集而反覆觀之則孝友淳篤之思與夫風流吐納之美可見其什之一二焉華會之詩

高華鴻亮無纖音無累氣以此倡教天下如奏金石以破蟋蟀之鳴蓋鉅人端士之詩視山林枯稿之作其氣象區以別矣他日當以文章勳業輝赫當代子幸附同籍之末所以誇示於人者又不徒以其辭章而已也康熙丙子夏五月婁東年眷弟唐孫華拜題

南歸草

沐園三集

桐城姚士藹華會著



武進楊大鶴芝田選

假歸畱別張姑父姑母暨卣臣表弟

幾年趨史館猶子荷恩深愧逐芝蘭隊欣分桃李陰詩書聞與義山水話歸心却訝初飛鳥翩翩返故林

又

敢言投暇樂暫爲省親行主聖陳情易官畢去國輕春暉憐寸草長至許兼程白髮能加飯他時

待耦耕

又

久客依姑膝。言歸欲別難。冰霜當歲暮。鍼線念裝寒。反哺長林鳥。和鳴碧樹鸞。眼枯萱室淚。相送轉悲酸。

去歲值先祖母之變

又

才子推宮允。情親弟與昆。雁行慚馬齒。鵷序遜鵬。騫抽筆三朝史。論文五夜尊。傲君無別事。幽趣滿柴門。

又

弱息歸華閤。佳兒入帝都。上林交玉樹。太液繞鵷鵒。下食孫依祖。承歡母是姑。所嗟離別去。分手只斯須。

又

兒女寧關慮。庭闈獨繫思。梅花春滿塢。椒頌酒盈卮。歲月賒鳩杖。恩波沐鳳池。望雲閩海吏。便紙報歸期。

時家兄倅漳州

又

玉署名賢聚。遷除法變通。百年供半菽。一日重三公。霖雨沙堤上。參苓藥籠中。有才需薦達。作賦擬

河東

又

性最耽丘壑。身偏倚廟廊。數椽心指畫。三徑夢翱翔。紅藥愁仍瘦。青松料已長。家書傳仲子。灌植肯教荒。

次女于歸詩以送之兼示張壻巖舉

養女及笄歸望族。嫋嫋絲蘿附喬木。婚姻盟好舊朱陳。玉潤郎君新坦腹。兩家作宦客長安。西華賜第開金屋。寶馬香車旭旦迎。粧臺鸞鏡輝蓮燭。路繞金鰲玉螭邊。上林全樹雙棲宿。人情競美簪紱。

榮我重高門。清白聲子孫。世守青箱業。一經寧用金滿籬。卽今宗伯聲譽起。星辰早曳尚書履。御屏隔座侍講賢。鳳池並掌絲綸美。寵眷優隆絕比倫。門無車馬心如水。堂前王母汝祖姑。鍾禮郝法近所無。汝姑越郡名家女。一門雍肅賢淑俱。女今作婦奉箕帚。重幃懿德皆楷模。郎君勸學及年少。趨庭詩禮傳家教。舉案須如梁伯鸞。畫眉不數張京兆。無復作女容嬌癡。柔順坤貞本婦道。慎勿爲好疑過言。紉繹此義殊微妙。我今乞假歸省親。汝母泣別淚沾巾。汝依祖姑卽祖母。姑復愛如掌上珍。

眼前離別何所恨。願女莫忘訓誠頻。古人牽犬亦佳話。玉堂冷署憐粧貧。女不見起居八座太夫人。至今鈇荆裙布猶在身。

出都別同館諸子

玉署集羣彥爭擅翰墨場。獻策類賈董作賦誇班揚。我才愧謏劣我性復疎狂。敢薄聲氣交恐貽比匪傷。二三素心人志合聯同堂。論文析疑義倡和多篇章。有時良宴會醉飲累十觴。歲月曾幾何離別如參商。倦羽思故林分飛不迴翔。中有一俊鵲。健翮凌穹蒼。長風困遠舉。乃罹羅網殃。更傷玉樓

客悲風生白楊。聚散本無期榮辱寧有常。萬物歸何有死生齊彭殤。我復揖別去行行上河梁。輕裝壓錦句寶此明月光。寒雲沒孤雁馬首遙相望。

馬上望西山敬懷宛平夫子

蒼翠挹西山蜿蜒屏幃列。夕陽帶飛鳥烟光歛明滅。曾陪謝傅遊秋山。問霜葉凌風俯層軒。曉窗上黛色峰頂登傑閣。指點雲中闕更與尋源頭。茗香泉味冽元老饒勝具。飛騰陟嶧嶠登高插茱萸。帽落佳賓側我才愧叅軍。詩成爭擊節春來訂重遊。一朝成遠別子舍慰瞻雲。師門遠立雪普天猿鶴。

安太平賴勲業他時奉杖履搜討盡幽折

遇雪

四野陰雲合花飛六出妍迴風搏急霰捲地走輕
烟屋隱欹斜樹鴉歸溟漠天前村帘影動酒價已
增錢

投宿

荒草驚鴉起飛飛晝欲昏烟高知近市樹密自成
林平野日孤照輕雲月半痕望中投宿處駑馬亦
先奔

馬蹏

長空號朔風平野凍積雪河水結層冰欲渡不可
涉危梁石齒齒寒溜鏡古鐵升降寸步艱路滑霜
蹄濫天寒汗浹背庶幾免傾壓行行遵坦途舉首
意舒悅草根無纖塵沙明襯蹠蹠誰知緩步行一
蹄馬骨折險易勢何憑倚伏機莫測太行有全輪
康莊多覆轍君子防未然保身貴明哲寄語世間
人處順安可忽

渡河

彭城河水去滔滔車馬經過問渡勞積雪望迷銀
海遠斷水浮出玉山高古今戰伐矜天塹風日昏

黃捲怒濤欲弔興亡重回首戍樓烟外鳥啁嘈

謁閔子墓

曉征拂霜花千山靄朝旭林樹鬱青葱白雲覆茆
屋傳是先賢居古墓華表蠹積雪凜寒威緬想御
車日有衣着蘆花異母未云酷母去三子寒至性
語悽惻子孝親心慈間言何由入傷哉失母人再
拜淚沾臆

岳武穆故里

廟有無字碑其光可鑑壁存滿江紅一闕

陶山古荒驛間氣鍾靈異武穆廟貌存古柏鬱蒼
翠悲歌詞一闕千秋凜正氣忠肝照日月幽光磨

古碣痛飲抵黃龍惜哉志未遂爭言權相奸未識
人主意高宗南渡時心已忘二帝假手戮功臣苟
安主和議祖宗創業艱陵寢棄如遺最憐百戰功
九仞虧一簣前村雨忽來爲洒英雄淚

入龍眠山遇雨

亂流隨壑轉仄徑繞溪行樹色上衣碧水光如鏡
平霧深樵唱隱日過甕烟明雨洗風塵面悠然心
倍清

又

天地入虛碧蒼茫一徑分灘高排嶂雨石潤出溪

雲生果當頭墮幽禽近耳聞山深本空寂衆響自紛紛

又

入夏綠陰滿山家樂事真燕巢依舊主蠶箔忘生人荷鋪分秧嫩腰鎌刈麥新何時扶杖履重到問漁津

刪竹

綠竹沿短牆琅玕拂雲際天風吹清籟虛檐落寒翠陰籠烟霧深影弄星月碎蒼葺棲宿鳥晚噪饒幽趣遊子久客歸三徑襟蕪穢昔時檀樂姿黃落

色憔悴禿篴枝傾斜叢生葉繁翳剪伐不辭勤蕭疎轉便媚春笋茁舊林預籌培護意獨酌開新樽含悽發長喟

除草

短砌甃寒石細草紛牛毛罅隙得土微滋蔓根蒂牢幾日不夷薙三徑埋蓬蒿課童指爪禿宿雨仍青袍王孫去不歸萋萋春江皐靡蕪若永死天地息輪尻况乃蕭艾敷刺目忍弗薅薅之縱難盡秋霜焉能逃湘蘭紛九畹芳芷傳楚騷賦質各有別立身惟吾曹

移花

宿莽苦難除嘉卉未易植托根均寒暄識性辨燥
濕樹下草不芳高柯交枝密移栽就空階庶幾雨
露及幾載困風塵倦眼迷賞適藥欄生平心故物
洵足惜懶僕費驅使恨乏抱甕力浩蕩借天光沾
潤丐膏液羣芳輸異姿何必不挺出爲語東皇知
爛熳酬春色

鋤畦

墻東一席地爲園頗有餘分畦拾瓦礫可以植嘉
蔬節序亦已後播種卽爲初老圃授我法揮汗時

自鋤雨後早甲圻瓜藤走階除攀援四壁上綠陰
垂我廬桃榴遭纏縛欲斷還躊躇開花亦爛熳點
綴籬落疎虫吟月皎皎蝶舞風徐徐偶爾寄意興
竟似幽人居

購書

四體不勤動萬事坐荒廢詩書不誦讀眼耳等聾
聵敢言聖賢傳斯道在我輩自慚魯鈍姿未能窮
六藝幸免金根誚得窺玉堂秘三載望雲心復作
南歸計牛腰遠道難蠹簡腹笥愧家藏足搜討親
病久委置高樓風雨餘手澤忍捐棄無從理殘缺

欲理輒涕淚虛齋着閒身天地一疣贅東隣問細
帙典衣購匪易貪目忽炫富放心有專寄恍如遇
故人晤對竟忘寐深宵浮太白不覺陶然醉

買菊

手種菊盈畦節至跼萼小非關移植遲良由灌漑
少寂寞籬落間坐送秋光老百錢買數本小軒競
環繞美人明靚妝紙閣霜天曉靜對媚幽獨清芬
入懷抱採英井谷泉服食徒滋擾何如栗里翁有
酒卽傾倒醉歌挿滿頭永言顏色好

冬日雷雨

三秋旱魃肆酷虐金石銷沉土焦爍暴疋焚巫擊
鼓喧龍驅不出潛深壑豐隆霹靂職曠弛石燕商
羊事寂寞田禾已死畦菜荒井底泥乾龜涸立
冬之日殷其雷越日轟轟復大作重雲駢黜掣紅
綃軒轅騰空裂山嶽翻盆雨點如車輪狂飈颯杳
兼氷雹癡龍熟睡夏徂冬馮夷操搗怒驚覺得無
神物相鬪爭應是陰陽氣脅薄老農更懷來歲憂
我喜新栽樹生活

癸酉元旦

晴雪初消曙色遲婦人花鳥不知悲白雲在望陳

情日丹闕沾 恩賜宴時簪筆憶聯椒柏頌歸田
痛廢蓼莪詩從今獻歲屠蘇酒無復承顏進一卮
贈隣友范百穀

鄴架雲亭日討尋 夔桐柯笛有知音常聞擊節多
高詠靜聽傳經用苦心 永夜月同三徑影隔簾花
借一庭陰奇文若許予欣賞濁酒墻頭不厭深

依韻答柳寬先生

何用千金陸賈裝五車書足傲侯王避門課子傳
經樂近市看人作僧忙荷鍾湖田杭稻熟汎舟秋
水芰荷香只愁獻賦從多事未肯長閒臥草堂

友人分花見惠

寶欄乞名卉老幹剖新簪花譜良辰合霜天細雨
深端詳臨短檻爛熳想春陰恐負韶光好栽培隔
歲心

種花有感

曾探春光盛言歸自上林風塵京洛夢花鳥故園
心特地沾朝露虛檐借夕陰舊枝思手澤重植淚
涔涔

旱災行

自夏四月至七月亢暘不雨土焦裂擊鼓鞭龍龍

不醒雩壇皇舞空施設昔年有雨應龍船今年河
內無舟楫農家占驗盡成虛池蛙渴煞黃梅節去
歲立冬鳴大雷天心早兆旱魃灾下民有罪固當
罰聽農訴苦能無哀五年田荒半不耕桁無完袴
鬻無羹臂如久病復大作疔羸困憊難支撐有女
生年未十五一朝牽賣向州府少者得活老者存
寧論骨肉分離苦眼見禾苗無粒顆哀哀待哺將
安可忍饑莫使賣兒錢縣官催糧急如火

過巢湖有雨意

冒暑荒村幾日程清波到眼覺怡情山臨水面姿

多嬌雲起湖心勢易成巢燕遠飛衝雨腳林鴉急
去有風聲陸行爲脫波濤險却美蒲帆一葉輕

散兵

血戰關河百萬師楚歌四面不勝悲一朝霸業天
亡日千載英雄氣短時蓋世拔山空自恨弓藏鳥
盡亦奚爲巢湖風起魚龍吼隱隱笳聲入夜吹

午過雞啼河

曉起風涼露未乾雞啼河畔午烟殘輿中無枕偏
能睡手內攤書却懶看小市魚求鮮味少荒村米
借熟春難蔬盤脫粟家常慣况是凶年要飽餐

水災行

山邊有田飛蓬蒿河邊有田鳴桔槔桔槔之聲徹
曉夜補救須視人功勞河流已竭細如綫盤轉直
上堤塹高寸波尺水視性命分溝截澗爭纖毫一
夜山雨忽大作河伯怒激翻神鰲泥沙衝塌禾盡
沒大樹不保根株牢連朝呻吟輒艱涓滴一望瀰漫
歸洪濤旱荒尚有土田在水災雞狗焉能逃蛟鼉
穴窟屋傾蕩携兒夜向山頭號山頭猛虎不足畏
白日噬人悸胥吏急傳里正去見官報災先辦查
災費

鄭懋嘉同年招飲休園

鄉里推通德名園舊署休松喬存手澤堂構繼風
流隔塢藏書屋過橋見畫樓城中車馬地愛此境
偏幽

又

籬壁遮亭榭迴廊曲曲通窗明花影外人坐柳陰
中深竹籠烟白層臺落照紅晚涼依古樹謾謾起
松風

又

沼跨長虹濶隄繁一水斜荷殘香在葉桂濕露含

花平石堪垂釣清波可汎槎最宜明月夜按曲拍紅牙

又

語石華軒敞開筵對碧岑一尊今夜酒十載故人
心螢火因風亂星光隱樹深高談頻剪燭驚起欲
栖禽

紅橋感舊

韶光一別十年遙旅客重來廿四橋幾樹桃花春
寂寂半堤楊柳畫蕭蕭平山夕照迷孤鳥邗水秋
風送晚潮欲待月明移棹去勾人又聽畫樓簫

鷓鴣行

捕魚空費網罟力坐畜鷓鴣數十隻不舟不楫竹
簞輕滿載湖心兩行立鷹眼愁胡意慘淡有魚無
魚能辨識遲回不下漁人催擲篙潏然示鞭擊清
波碧浪齊翻飛龍窟蛟宮恣深入數羣忽沒寒潭
中頰尾修鱗頃刻出大者同攫剪髻鬣小者爭銜
裂脣目眈何芒繭任公鈎未能百得無一失吁嗟
乎鳥何勞兮人何逸辛勤取魚不得食饑時鳴邑
向人啼飼以微腥仍德色提筐換酒人醉歸晒羽
斜陽鳥寒濕鳥兮鳥兮却爲誰極目江天長嘆息

郭飲霞年伯招飲

拂袖歸來賦遂初。枳籬花逕自蕭疎。古罇不惜黃金買，名畫猶收赤炤餘。逃世風流蓮社酒，養生工課漆園書。手鈔讀史詩千首，舊學陳言一掃除。

又

江上麻衣獨愴神。拜床父執最情親。自傷白髮無知己，老向青山哭故人。歲月總歸駒隙影，功名已驗枕中身。細傾家釀從君醉，早見橋頭月色新。

邗上遇玉朗兄

兄爲邯鄲令罷官歸粵

豈有陽城居下考，祇緣彭澤賦歸來。饑驅耻乞胡

奴米，搖落誰憐宋玉才。庾嶺早梅應入夢，揚州明月且銜杯。一官已熟黃梁飯，親向邯鄲道上回。

金山

北固遙連鐵甕城。孤根一柱俯澄清。江流已去忽攔激，海浪欲來能拄撐。院堦峻嶒清漢迥，樓臺重複晚霞明。山川何幸畱宸藻，千古招提得盛名。

妙高臺看月

看月人間興獨豪。妙高臺上玉輪高。手招素魄與親語，目盡青天無遁逃。異響忽傳蒼嶺鶴，大聲疑撼巨山鰲。夜來魂夢應清絕，一枕風生海外濤。

妙高臺看月後雷雨大作

百年歲月不再來。良時遊樂難與偕。中秋看月何處佳。金山頂上妙高臺。乘舟破浪携香醅。呼僧同坐浮大杯。一輪玉碾明鏡開。雲車縹緲升蓬萊。青天萬里無纖埃。長江匹練光滌洄。手招素魄入我懷。欲拔丹桂連根芟。高歌長嘯凌崔嵬。萬籟吹動秋風哀。下方魚鳥休驚猜。夜半欲去猶徘徊。忽然匿影嫦娥回。重雲四布飛沉霾。馮夷鼓過山嶽頹。紅綃火掣天地迴。狂飈猛雨勢傾潰。洪濤巨浪聲喧豕。得無白鼉與黃能。兩相爭戰吞江淮。頓使耳目駭異心。志灰自來陰晴變態頃刻乖。誰能到此絕頂看月兼風雷。人生得遇美景誠快哉。急誌勝事詩堪裁。

金山讀

御製詩文恭賦二十韻

重到金山寺。巍然迥異前。翠華停日馭。紫氣煥星躔。埤堦銷高壘。闌干俯巨川。嘉名新佛剎。御額照江天。布地金多矣。留山玉渺然。操舟通理喻。作記託心傳。翰灑琉璃匣。詩成錦繡篇。明珠輝大澤。初日浴虞淵。氣浩無邊海。心清第一泉。揮毫都

是彩用筆更如椽燦燦龍鱗舞翩翩鳳羽騫銀鈎
千弩勁鐵畫萬鈞懸永鎮山焜燿無憂谷變遷江
流平駭浪帆影帶晴煙網罟魚鹽集梯航寶貨駢
僧誇瞻舜日民喜祝堯年遊豫恩施普碑珉寫楊
妍敬瞻頻拜跪樂誦更留連聖學同天健愚衷
測影偏願偕韶濩樂清越播朱絃

瞻仰

御書江天一覽四字恭賦二絕

千頃烟波夕照紅布帆無恙送秋風眼前有景誰
能道盡在江天一覽中

又

四字揮成萬古垂鸞飛鶴舞勢爭奇夜來風雨濤
聲吼定有神龍護御碑

夜過無錫城下

傍夜扁舟過錫城晚烟初斷報嚴更半天月向橋
陰出兩岸燈從水上明畫舫移來鶯燕語微風吹
送管絃聲深宵更向前村宿林外棲鴉夢不驚

晤勞在茲感賦

師友生平誼文章道自尊山川隨夢遠藥石寄書
論空作今時誅難招昔日魂寢門遲一哭知有老

親存

又

秋水吳江權重來十載間楓橋尋舊路鶴市掩深
關書在兒能讀詩多性懶刪雲烟託毫素不用買
青山

開府宋牧仲先生招飲

開府移來檠戟臨甘棠仍覆昔時陰八方霖雨蒼
生望半壁東南聖主心鈴閣屢膺新簡命綸扉
世領舊朝簪恩波千尺西江水直注三吳澤更深

又

先生以遊匡廬及
看梅倡和詩見示

文采風流雅擅長宦游勝人處
生屐召客南樓月滿床白雲難爲巴里和梅花應
待廣平香相逢不盡晨星感握手悲歡累十觴

呈悔菴尤太夫子

親炙光儀慰所思鯉庭才子是吾師頽瓌衣鉢應
難及歆向淵源未易窺四海文人推獨步兩朝
聖主荷深知儲賢本是先皇意召用蘇公已覺
遲

又

藜閣緡書五夜賒茂先博物盡三車詩過杜甫還

精律筆老江淹更有花北闕功名歸史學東山歲月付烟霞及門後輩多卿相上座耆英數鬢華

虎丘遇愷似感賦

才人自昔慎風波似爾奇冤可奈何洛下名因司馬重獄中詩和長公多厄憐磨蝎同躔斗窮戒枯魚泣渡河見說洞庭秋水靜且操漁艇臥烟蓑

又

執手疑從夢裏旋飽經憂患轉恬然更無友誼堪千古只有君恩是二天回首雲迷鸞掖迥當頭月共虎丘圓新詩豈學離騷怨不怨逢人莫浪傳

尤太夫子招飲水哉軒步原韻

蓮沼開亭榭凭欄意快哉牽船疑泛宅臨水却登臺歲月看花事生涯託酒杯相親溪上鳥朝暮自飛來

又

侍立在川上塵襟頓豁然敗荷喧暮雨早菊淡秋天池草清宵夢柴桑白晝眠俯看魚躍意此趣許誰傳

又

牆東尋大隱曲水卽溪濱書額標遺老青山閱故

人功名蕉覆鹿。身世海生塵。真作烟波叟。虛槎理釣綸。

又

更登高閣望。取徑竹林間。誰識莊生樂。天容白傅閒。開窗延綠野。倚檻揖青山。卽此丹丘是。何須覓大還。

玉峯篇呈東海夫子

我來仙邑登玉峯。玉峯峯高俯城墉。峻嶒怪石蹲虎豹。蜿蜒山勢蟠螭龍。珠宮紺宇接碧漢。琪花瑤草交蒙茸。蒼巖葱鬱柏千樹。石隙尚有秦時松。上

鶴鳴山天籟琅玕

華鐘前賢題詠滿石

壁苔蘚不蝕銀毫鋒。誰家古墓在其下。草荒馬鬣號秋蛩。萬井烟火瓦鱗集。連雲綺疏樓臺重。郊原耕穫近在目。湖水一片光溶溶。山川奇秀稟造化。中有仙人間氣鍾。玉皇香案授真訣。朝裾劍珮鏘珣琤。晨遊北溟暮南海。乘風萬里無留踪。一朝息影屏羣慮。乾坤氣象羅心胸。浮雲蒼狗妖蜃幻。道氣不動心中容。君不見陰霾晝晦風乍捲。依然玉立青芙蓉。

侍夫子飲北園

疏傳謝紅塵拂袖歸田里遂初舊草堂三徑擴新
址玉峯羅庭前看山坐屋裏儼然屏幃列大癡畫
可擬竹樹搖嵐光青靄直照几板橋接石磴樹欹
任坐倚池邊弄晚姿芙蓉鏡清沚往來多親串晨
夕數知已時時話農桑語不及青紫我來侍絳紗
秋光伴杖履坐聞木樨香無隱叅妙理柴桑有至
樂得天豈云侈子美吟浣花摩詰繪輞水斯人邈
千載芳躅足追美

東海夫子席上見王薛澱前輩新句賦寄
尚書席上誦詩新得助江山句有神三鳳同時齊

令譽九峯勝地著才人也隨洛社頻携酒暫趁秋
風一采蓴我買扁舟欲相訪池塘早覺夢魂親

沈南季畱飲雙杏草堂兼柬令兄彝叔

九日風兼雨孤舟晚更移相將故人酒不負菊花
期綠綺調絃潤青山入畫奇登高阻泥濘恐觸異
鄉悲

又

機雲同唱和雙杏草堂居銀錠新鐫帖牙籤舊賜
書安貧生計拙學道世情疎相訂還朝早才名在
石渠

南島草
總憲儼齋先生招飲園亭

繡衣班長絳騶呼高第才華世所無
臺閣風鳴梧百尺庭堦鶴繞樹
三珠良材史讓歐公筆正學功
歸魯國儒早晚星辰重曳履黑頭台輔拜恩殊

○ 又

遊筇暫住叩花關綠野平泉覺等閑
徑轉層巒看磊落潮通虛閣聽潺湲
屋疑輞水丹青裏人在蓬萊縹緲間
戀此不如林際鳥有時飛去又飛還

舟中雜興

菱港眠鷗靜蒲溝浴鴨多
廟新村市近帆落石橋

過舟婦能催櫓吳儂晚賽歌
行行看月上不用慎

風波

又

暫泊朝趨市喧聲到岸邊
白漂菱菜淨紅摘水菱
鮮村媪閒編網橋僧苦募錢
小蓬深港出爭喚賣魚船

又

風物江東好深秋畫舫居自斟
三白酒看煮四腮魚茶熟詩成後
香添睡起初寄書京洛客清興較
何如

又

幾日愁多雨連宵更長潮濕垂傷稻穗遠沒失魚
標放水培高岸行船碍小橋大江風景似蘆荻響
蕭蕭

又

未覺吳江遠河流碧一灣扁舟來異地客夢在鄉
關鷄唱桑麻外鴉歸竹樹間烟巒青幾點多是越
中山

又

籬下花猶早山中桂已殘雲低秋易雨海近夜多

寒晒網知魚少提筐問蟹難尚餘尊酒綠吟興莫
教闌

遇汪快士

忽遇布衣老停舟一暫過橋携閩海遠石載壽山
多篆刻眼徧亮飄零鬢未皤坐談旋欲別袖內出
詩歌

憶故園秋花

菊花

殷勤種菊剪蒿萊預擬三秋對舉杯今日黃花應
笑我開時不見主人來

錦莧

色先霜葉醉臨風。點染新粧學漢宮。雁到江南秋正好。書來爲報幾枝紅。

紅蓼

遍栽紅蓼近清渠。小閣虛疑畫舫居。真把扁舟深港住。一天秋水較何如。

海棠

柔姿弱質傍牆陰。紅汗低垂碧蘚侵。遙憶一簾秋雨後。不勝嬌怯睡沉沉。

芙蓉

亭亭玉立倚秋風。霞綺粧成弄晚紅。海國移來三醉種。江南芳艷可相同。

家兄自閩漳移來者甚佳

鷄冠

短砌花開錦翼齊。朱冠絳幘鬪雄鷄。多情恐破閨人夢。咽盡清霜不敢啼。

書冊頁寄示汀姪

之無解識愛黃庭。千里名駒屬阿汀。數首新詩書寄汝。歸時誦與老夫聽。

讀莊子純五十自壽詩賦贈

百年歲月白駒過。五十看君鬢未皤。臚仕名啍翁。

子晚苦吟詩較達夫多春風把笛吹楊柳秋水乘
槎泛芰荷蓮社有人能快飲酒爐茶竈共高歌

湖心亭

亭在水中央高樓傑然出四面湖水清兩岸柳絲
綠屋影沉忽浮鳥聲斷還續遊人放舟回亭午競
絲竹人去風蕭蕭夕陽在孤麓我獨憑危欄薄暮
一遙矚有客題勾留香山句空讀試看湖中鷗日
與清波逐

放鶴亭

孤山何逶迤湖水競環繞樹影含波光雲烟變昏

曉古梅枝橫斜照水影常好如聞鶴唳聲清籟發
林杪高亭起山麓古墓委秋草千載仰高風清心
波浩淼薄暮掉舟還前山月正皎

岳墓

人世各有死死重如泰山骨化黃泉下名垂青史
間金兵秋隼强宋主孤雛孱所恃岳家軍一夫能
當關黃龍遂痛飲二帝將迎還奈何金牌下遽促
師旅班天子委豺虎功臣棄草菅血染墓草碧淚
洒山花殷白日照青燐丹心彌塵寰後有于忠肅
亦能當大艱千載調不孤英氣相追攀陵谷有變

青島草
遷不改忠與奸至今墓前柏苔蘚長斑斕

放生池

昔人設網罟用意已非厚賴有放生名聊以補闕
漏築堤湖中央石橋危可度短牆緝宇孤荒堦碧
瓦鬢髮梳水草細鏡展波紋縐有魚躍深淵悠然
忘夜晝不知江海寬轉覺濠濮陋王道本愛物儒
釋理非謬見說買生放前舟理罟罾

飛來峯

乾坤亦何常山川造靈異空絕斧鑿痕怪使鬼神
悸翼伏不向天根拔豈藉地亂石懸參差風雨恐

驚墜陰洞可四達曲竇有向背晴巖滴石乳蒼苔
染衣袂古樹石隙生天風落寒翠或自靈鷲來偶
向此中寄

冷泉亭

溪水脉脉流沙明細可數澄澈鏡容顏清冷沁肺
腑峭壁當其前怪石若俯僂倒看秋樹林天光蕩
容與落日石梁下孤鳥立寒渚輕風來有痕浮雲
去無主塵事了相關雲中報鍾鼓人去影不留一
泓自今古

雲林寺

古寺抱山麓樓殿何崔嵬上有藏經閣下有說法
臺御筆照中堂璀璨雲霞堆白雲栖深林天風
吹不開秋花間霜葉點落青苔堦禪機本靜寂到
此心慮灰夕陽西嶺下明月東山來遊人欲旋歸
四顧空徘徊

石笋峯

取徑入深竹牽蘿陟丹梯翠色逼衣冷古磴窮攀
躋有石自爲峯矗立如挺圭誰將并州刀切玉如
切泥細草披危石秋花隱深谿樹杪流清泉直下
萬壑低竹筴引雲端到廚還灌畦江湖極目遠波

與天光齊幾點海門烟澹宕斜陽西飛鳥隨片雪
孤踪何處棲我欲向天末休教望眼迷

四賢祠

造化生才人身名託勝地上下千百年大道在同
氣立德與立功禋祀典勿替六井泉清列長堤柳
深翠蘇白經濟才濬築資永利况復詩文傳山川
爭藻麗鄴侯踪跡奇珊珊骨相異翊戴唐室功刺
史出餘緒卓哉林先生出處無異趣鶴子而梅妻
更少功名累四賢已千古高風誰能繼紛紛今人
祠對此得無愧

吳山

置身在卑下耳目徒拘隘偶陟吳山巔頓覺天地
大肩輹闔閭喧古今一都會逶迤鳳凰山猶傳宋
大內江流富春來濤聲日澎湃指點數郡間山川
競環帶海門氣微茫飛鳥沒天外大風吹晴雲虛
空無芥蒂回視西子湖團綠如荷蓋四圍山色青
一鏡描螺黛遊舟紛柳堤誰能問上界安得同靈
運高歌發天籟

西湖口號

西湖歌舞已成塵桃柳重栽兩岸新不是宸遊

曾駐輦鏡中無復舊時春

又

小閣窗櫺透曙光長堤烟靄散垂楊四圍山展青
螺黛一鏡中開照曉粧

又

朝暮觀湖湖態奇靜看奇處少人知欲明又滅光
無定漸是東方月上時

又

波光月色白紛紛小艇閒遊近夜分更向裏湖深
處去輕鷗衝破一溪雲

又

淡雲籠水水籠烟月黑星沉不辨天遙指樓頭回
岸住家家燈火是湖邊

又

近來宦績在豐碑山麓生祠到水湄只恐林逋無
住處驅將仙鶴斬梅枝

又

鐵騎長驅勢不孤金牌驟下亦何愚趙家陵寢今
安在岳墓猶存柏未枯

又

琅玕千尺拂雲清看竹無人自在行我亦有園拋
未住移文不敢笑先生

又

商家園鎖桂花香未許遊人過草堂三徑松筠門
不閉蕭涼裴相午橋莊

黃文恪
公舊墅

又

維舟欲問北高峯說過前溪九里松行到石橋無
一樹幾時風雨失蒼龍

又

遙向雲林一叩關望中紅樹滿秋山遊人只在湖

中樂誰解尋幽到此間

又

鷺嶺飛來萬里遙。梵宮相對峙青霄。祇應怕被遊塵污。不肯乘風過六橋。

又

僧舍看山日已晡。夕陽何處酒堪沽。行人爭指橋頭肆。蕭九娘家舊酒壚。

別西湖

六橋流水靜無瀾。十里長堤一鏡寬。鎮日烟波隨艇泛。有時風雨上樓看。秋橫螺黛含山翠。霜點胭脂

脂着樹。丹更訂重來尋舊約。寄題詩句碧琅玕。

渡錢塘江

西湖別去過山隈。又買扁舟向晚開。海口烟巒橫夕照。江頭風浪走驚雷。曾聞柁鼓中流渡。想見潮迎勁弩回。清宴卽今多盛事。天王親祀禹陵來。

夜過蕭山有感

家叔曾爲縣令

回首吳山落照邊。西興渡口夜行船。兩堤桑葉青遮地。一曲河流碧到天。城裏人家燈在水。林中村舍月籠烟。安仁已逝花如舊。憑弔秋風意惘然。

夜行

不知程遠近靜夜任舟行樹影有時見燈光何處
明露深聞蟋蟀星暗閃流螢林外天微露如鈎月
漸生

霜降日見雁

萬里玉關遠秋風木葉推霜從今日降雁自幾時
來書信有誰寄饑驅空自哀他鄉同是客相見莫
相猜

又

歷歷尋行度長征未寂寥影高迷嶺霧聲遠帶江
潮雁蕩君歸近天台我去遙鄉關重回首一夜髮

蕭蕭

自嵩壩至天台道中

乾坤無盡處別有一山川水碧侵柔草嵐青混遠
天舟隨千壑轉風借半帆懸樹裏藏茅舍雲歸接
暮烟

又

松出雲飛盡潭空日照虛繞林雅奪食蹴水鳥銜
魚沙上推船過山頭引纜徐無人清絕處定有老
僧居

又

澄潭停碧水舟在鏡中行峭壁無人到奇峯落影
清靜觀心自遠孤照眼偏明鷗鳥隨波下悠然忘
世情

又

石欹臨水出岸險逐潮崩秋樹紅懸果蒼巖綠覆
藤支溝橫蟹斷迎溜起魚睬野老呼船渡言尋嶺
外僧

又

三秋遭旱魃九月復洪流猿鳥悲巢失魚蝦上屋
遊灘沙移岸脚草梗挂枝頭漂沒居民苦無須問

薄收

又

懷襄今復見山上有潮痕峻嶺荒烟合孤城野霧
昏村墟千頃廢鷄犬幾家存欲作監門繪誰能達
至尊

又

峯影層層峻溪聲活活流遠山吞落日野岸帶孤
舟烟合羣鴉暮風高一雁秋淒清天外客那得不
生愁

又

秋色藍輿道丹崖可縱攀過江千里路躡屨萬重
山杉入青冥裏楓明夕照間茂林多好鳥終日語
關關

又

何處丁丁響林間唱晚樵山田開斗大石岸上梯
高種麥先燒葉營居早索紉家家聞絡緯更覺婦
功勞

又

深谷誰能隱前溪路自通柴門紅樹裏水碓白雲
中架屋依巖壁疏泉灌竹筒有翁扶杖出或恐是

龐公

又

蒼松千萬樹倒峽碧濤吹谷冷風生早山高日上
遲陰巖晴滴乳曉露濕垂枝近日聞防虎牆頽掩
竹籬

又

嶺頭尋宿店石畔倚危樓暮靄千峯紫斜陽萬樹
秋星辰高可摘麋鹿近同遊枕上懸崖水潺潺入
夜流

望天台山

搜嶺尋山興頗幽。人間原自有丹丘。赤城司馬能
身隱。天姥青蓮入夢遊。道上瀑從蒼壁瀉。峯頭壺
共白雲浮。石梁若許予深度。芝草琅玕定可求。

嶺上卽景

翠竹蒼松欲接天。人家多住在山巔。黃鋪夕照收
烟葉。白亂殘雲晒木棉。一鷺墮空驚遠逝。孤鷹入
漢更高騫。俯看萬仞潺潺響。絕澗平飛樹杪泉。

客中對雨

遊踪無定欲忘歸。漸覺他鄉景物非。紅橋早經霜
後熟。黃花纔綻雨中肥。霧連海市天常晦。風冷山

城雪早飛。日暮家家砧杵急。秋殘何處寄寒衣。

台州

天開鳥道鬱巒岈。上應台星一郡寬。古剎峻嶒雙
塔迥。高城蜿蜒萬峯攢。日移靈霧山嵐重。潮帶霜
風海氣寒。漸覺居民營舍宇。幾年蜃市靜波瀾。

天台道中

山近仙家紫氣浮。赤城霞起望層樓。蒼巖翠壁千
重靄。烏桕丹楓一色秋。聲亂空林喧野鳥。波明寒
石漱清流。桃花渡口人間路。可許劉郎問舊遊。

赤城

衆峯環孤縣空濛入蒼翠一出城西門烟靄覺明
媚仰視赤城霞丹樓空中麗週遭萬丈壁百雉鄙
埤坳岡巒走逶迤向背有井次儼如百萬師奔馬
勒回轡前營建大纛衆軍使指臂上有穿劍巖懸
空誰擊刺數椽撐危崖欄楯臨無地玉京路折藏
釋籤逕微邃曇猷洗腸井叢生萑青翠蒼松吹天
濤楓林挂秋霽絕頂插浮屠鈴鐸振空際天台啓
門戶從此登堂陞

國清寺

羣壑亂奔赴一水自迴繞知有古寺基雲烟望縹

緲山盤白鶴深徑入萬松窅夾道蟠虬枝蒼濤落
虛嶠浮屠影參差高尖矗雲表雙澗會衆流危虹
跨清沼亂石欹古雪激射日明杲池荒泉泠泠一
碧散寒藻無塵殿突兀杲恩絕虫鳥老僧延我談
茗香謝煩擾但聞溪聲喧自覺禪心悄遊屐愧匆
忙未能竟幽討揖別入雲中清鐘出林杪

由金鷄嶺入石梁

冥搜歷崎嶇峯勢凌岬嶸更上金鷄嶺舉足蹋木
末鳥道蟠龍蛇折旋上碧落回首視國清萬松點
幽壑白雲環山腰露頂如浪泊綿亘龍脊行平衍

南歸草
轉軒豁長溪一縷明微茫帶遠郭層石起危臺兩
壁相對削懸瀑驟喧厓晴烟飛溟漠攀蘿陟危磴
苔滑步屢却片石臨溪平塵纓坐可濯深林風颭
颭陰崖日光薄返照隔前嶺山樹影參錯采芝慕
神仙思跨雲中鶴窮冥寂無人忽訝樵歌作

望華頂

自入天台來已擬華頂宿遙指層霄間崔巍獨高
矗萬有八千丈崕嶮四山伏飛鳥不到天歸雲在
林麓羲之畱墨池太白有書屋高僧拜經臺古蹟
半沉陸蕭槭吹殘楓青翠束細竹夜深凌風寒未

曉賓朝旭義馭驅火輪赤盤走坤軸海水沸洪爐
銀光捧圓殼升騰久始曙天鷄驚喔喔長空霧遮
蒙往往艱遠矚茲行值初冬霜風早嚴肅僕夫不
肯前跬步嗟跼促艷聞土人語使我蕩心目明霞
帶遙青悠然逐鴻鵠

石梁

路下金鷄嶺山嶂作奇態斷壁削無垠兩巖兀相
對密樹隱流澌晴空濺烟靄片石橫天機坤軸弱
難載誰與鑿長虹透出銀河界古鐵運神斤蒼龍
負厚背禹功失自然五丁亦安賴一春容趾難下

視心膽碎奔流兩礫合淙淙鳴玉珮湍湑瀉空竇
直下無限碍晝夜喧大聲廣長舌不壞銅殿當其
前後立蒼石大古樹懸藤蘿垂幔晝常晦曇華亭
凌霄晴雲飛飄飄凭欄恣奇觀真宰意難會恍遊
牛渚邊已度鵲橋外歸欲問君平古今事何怪

濯纓亭前觀石梁瀑布

奔流瀉萬丈俯視目驚眩取逕下方廣始能覩瀑
面孤寺晝暝寂古壁潤苔篆雲氣吹霏微松竹色
葱蒨林間靜聞喧溪濱坐近見一片太古雪九天
濺微霰飛帛橫璿機玉龍下深塹陰晴無定時明

滅石倏變返照沉深潭寒光送激灑安能六月來
手披冰雪卷

上方廣看月

杖策萬山中投宿上方廣薄暮叩僧扉日落月已
上佛燈樹間明禪鐘空外響籠竹烟霏微迴溪雲
蕩漾清暉逼夜寒高空倍蕭爽泉聲不住喧草間
荅秋蟬霜風悲猿狖山火鑑颺颺不知月光移漸
覺樹影長廣寒蓬萊宮承露仙人掌何似萬仞巔
舉頭愜幽賞瓊臺雙闕間乘風欲孤往生平丘壑
心焉能脫塵網

桃源

神仙非荒唐方術未怪異不死藥可求豈能兼富貴
劉阮有仙骨采芝豈無意恰與二女值一笑姻緣
締飯以胡麻香飲以瓊漿醉逍遙芙蓉城相期千萬
歲何事思人間到家世七易子孫不相知往事如夢
寐更欲尋舊遊化城已深閉至今仙源迷雲烟鎖空
翠秋殘楓葉丹彷彿桃花麗尚有雙女峯窈窕插螺
髻溪流日潺湲珊珊鳴環珮宿草寒猶青山容粲然
媚五城十二樓何必非此地仙姬難再遇風塵色
憔悴惆悵空徘徊前山日已逝

藤杖歌荅萬年寺僧

峯巒下走萬丈低竹樹上干霄漢齊陰崖疑有虎
嘯白晝時聞猿狖啼仰視飛鳥不能度置身安得
青雲梯喬松絲牽蔦蘿弱洪荒萬古相纏縛密幔
濃陰不辨天霜侵雨溜苔斑剝懸空瀑布奔驚雷
清秋警露鳴雙鶴刀斧無憂走樵叟老僧得自何
人手斷爲七尺拄眉長滿身錯節盤蛇蟠玉石磨
刮光可鑑刀錐鏤剔眉目剖我實愛玩却持贈何以
報之須瓊玖從茲向平五嶽去登臨不患無勝具
攫霧拿雲活似龍飛巖越嶺輕如鷺少陵常

百集
三
恐雙杖失君山湖上憂難度我願青鞵布襪常伴
君素質莫使紅塵污

曉行

柔櫓輕搖破曉眠望中深樹已生烟村開小市人
爭往渡繫虛舟客自牽鴨逐母浮橋外水鷄呼雛
啄隴頭田秋原處處看收穫都趁新晴打稻天

禹陵

一穴天畱宛委真山川奔會露精神乾坤奠後安
陵寢禮樂明時定祀禋窆石衣冠封馬鬣梅梁風
雨躍龍鱗千秋聖主心源合駐蹕重輝廟貌新

仲升同年招同周弘濟泛舟溪上

爲愛峯巒列畫屏輕搖舴艋泛寒汀岸衝野鳥翻
波白城走饑羊嚼草青蜿蜒稽山瞻禹穴風流曲
水憶蘭亭回舟欲問蓬萊閣寂寞樓臺戶畫局

舟過富陽

一水環孤縣清流近富春樓臺出山上城堞俯江
濱銜照遙峯紫經霜老樹新布帆風正便薄暮問
前津

上灘

舟喧過前灘未至有灘聲截溜疑山轉廻船覺岸

行漱波寒石小織水晚霞明漸覺林光暝輕烟溪
上生

謁嚴先生祠

偶辭榮祿遂天機高節清風占釣磯白水何如江
水未客星常共帝星輝巢由踪跡無今古馮鄧功
名幾是非能使至尊成友道千秋休嘆故人稀

釣臺

裘敝寧須簪紱榮一竿雙石擅佳名山當勝地三
秋麗水爲高人萬古清雲外時聞鐘磬響竹間疑
有鳳鸞鳴亭亭百尺松長在風送寒濤作雨聲

曉至嚴州

溪流競滌繞烟火逼林垌雙堦浮高髻千峯展畫
屏霧收鴉出樹風急雁迴汀氣候炎方近秋山草
尚青

客寓

遠携書劍向天涯到處淹留興頗賒灑掃軒窗權
下榻安排爐竈竟成家濃香客餉蘭溪酒嫩蕊僧
分日鑄茶新得天台藤杖健烏龍山外問烟霞

旅夜懷伯兄

萬里奔歸天一涯傷心風木未銜悲弟兄相見此

何日枕被分來又幾時清夜哀猿如伴我遠天寒
雁欲依誰夢回耿耿孤燈在疑拭啼痕傍素帷

鶴唳

仙禽一唳破秋雲旅夢初回枕上聞聲亂松濤吹
謾謾響摧霜葉下紛紛蒼苔影印三更月碧海心
懸萬里雲合伴釣臺狂客舞清琴高詠有餘芬

枕上偶成

喔喔荒鷄曉漏催五更客枕夢初回衾寒氣濕知
霜重葉落聲乾似雨來羈鶴應思霄漢唳征鴻豈
爲稻粱哀近時妄想消除盡心逐溪流過釣臺

夢生子寄內人

月夜霜晨每憶卿寒溫最重老來情百年屈指將
過半一病回頭已再生書課嬌兒能檢點家逢儉
歲賴支撐饑駟只爲營婚嫁又夢珠擎掌上明

夜坐

天涯作客嘆蕭蕭旅枕尤難慰寂寥求寐有方書
久讀驅愁無計酒頻澆小窗紙薄風能透虛室寒
深燭自搖不分癡童偏促睡漏殘拚坐夜迢迢

不寐

久客長征未辦歸遊蹤無定雁書稀歲殘倍覺鄉

心切夜未非關酒力微。點鼠墮梁燈耿耿。寒螢鳴戶。月輝輝。隔林宿鳥頻驚噪。老樹風生葉盡飛。

飲葉子鬼別駕署中

官廨餘閒地。書窗啓向東。短牆排數竹。淺檻倚孤桐。酒減煩苛政。棋存揖讓風。烏龍山色好。坐對夕陽紅。

燈花

虫綴釵頭小。蓮生火際微。閃風烟一縷。吐月暈重圍。旅夜閒攤卷。深閨罷剪衣。遙憐占遠客。應怪信音稀。

嚴州郊外

偶步郊原外。尋僧問磻阿。避人穿市遠。喚渡禰樵過。日落寒山淡。風生老樹多。漸聞鐘磬響。蘭若隱烟蘿。

舟發嚴陵別武次翼端人

何事遠行役。冬殘尚未歸。故人情欸欸。惜別語依依。並馬臨官渡。孤舟出翠微。自憐同旅雁。又逐嶺雲飛。

晚泊

怪石爭臨水。層峯欲到天。灘高鳴澗雨。雲淡散溪

烟犬吠孤村近。鐘聲隔岸傳。河邊人語沸。燈火亂漁船。

蘭溪

先伯祖
宦遊地

野白沙連岸。空青樹一林。三衢奔瀨遠。雙澗注城深。蘭憶春山種。棠思隔代陰。捨舟扶杖遠。舊蹟恐難尋。

金華曉發

三洞知何處。雙溪繞郭流。寒烟輕冒水。古渡遠浮舟。大隱思劉峻。高僧問貫休。山川憑弔古。悵望沈公樓。

緡雲

崎嶇穿石峽。不覺到郊垌。樹倚層樓碧。山圍一縣青。鼎湖通御氣。蒼嶺隱仙庭。木落澄潭淨。龍吟水氣腥。

曉行

霜冷驚鴉夢。風高落雁羣。目窮千疊嶺。身入萬重雲。野霧連溪合。晴嵐出樹分。猿聲淒絕甚。莫遣客中聞。

桃花嶺

峻極桃花嶺。千盤到上頭。日荒峯若亂。天遠樹爲

浮雁入遙空沒鷹窺絕磴愁客懷隨浩蕩極目思悠悠

雲和署中雜詠

枯嶺微星應芝溪劍水清吏兼梅福隱遊稱謝公
情兵火存三戶峯巒列百城軒車曾未見媿說采
風行

又

廳廨無餘地衙齋只數間墻低遮翠竹閣小對青
山草並園蔬長花依石蘚斑庭閒門不閉溪外浴
鷺還

又

小邑官高臥窮鄉俗尚淳水渾沙洗鍊山瘠磧無
銀田召畊民墾糧逋土著貧布裙銅釧婦爭賣擔
頭薪

又

時有瑞柏
嘉禾之異

泮水菁莪頌桑田雨露和春先回瑞柏早獨有嘉
禾急瀨魚蝦少荒原鹿豕過西山饒爽氣拄笏日
高歌

同林涵蒼感賦

種花思舊雨飲水憶深源一代文章重千秋道義

存招魂驚化鶴作誅動哀猿懷袖三年字重看漬
汨痕

又

世路誰知已交遊仗友生脫驂今日事懸劍古人
情山水扶筇遠松楸入夢驚他鄉逢令節柏酒與
愁傾

飲廣文顧晴峯齋中

十載離家嶺外行蕭齋久耐客中情經傳絳帳生
徒密門對青山几研清手剪蒿萊開徑小眼看桃
李逐蹊成酒錢不少蘇司業頻把壺觴滿坐傾

瑞柏詩爲涵蒼賦

政先文教泮宮新禮樂修明俎豆陳鏤幹已枯階
下柏霜皮重發殿前春枝凌翠巘棲丹鳳影並晴
嵐動紫鱗雲有鳳
鯉二山自是萊公多異績西臺驄馬上
楓宸

除夕

代謝成今古年華有舊新人情爭守歲客意喜逢
春夢入鄉關遠交依故舊親耳邊無俗事天外著
閒身

又

草木未凋落。遐方柳漸青。客中看臘祀。夢裏見先靈。
忍淚燈休剪。含愁酒易醒。不須頻覽鏡。鬢髮已星星。

瑞香花盛開

小植成嘉卉。叢開鬪麗華。日暄浮艷早。窗近得香賒。
細纈團紅雪。輕綃罩彩霞。河陽花滿縣。對此亦堪誇。

救焚行

爲劉太守
林邑宰賦

雲和縣小無城郭。數家茆屋荒村落。高峯四面逼
螺青。前後雙溪通畧約。曠荒土瘠山利微。淘沙洗

鑊寒泉濁。畬民召募事耕耘。采樵婦女無完裙。縣
官賠糧自收穀。遠害惟看麋鹿羣。東西街頭樹木
柵。官衙民舍聲相聞。聞說昔時民粗足。衡宇相望
數百室。地隣閩嶠經寇氛。廢井頽垣餘瓦礫。近賴
守令仁。且賢招集流亡加撫恤。天心不爲窮黎哀
寥寥幾戶頻回祿。焦頭爛額身無棲。太守蠲金令
蠲粟。山中伐木屋。易成誅茆代瓦門。編竹君不見
劉琨拜火天。反風鄭國請玉襁。祝融天災流行亦
時有。補救能回造化功。小民安堵復如故。家家尸
祝將無窮。

甲戌元旦

地近炎方暖較賒驚逢令節在天涯青青柳吐迎

春葉馥馥蘭開獻歲花

俗名拜
年蘭

日近長安心戀闕

雲迷越嶺夢還家相逢故舊椒漿醉寸草含愁感

物華

立春

桃柳芳菲百草生青陽初動物爭榮嶺頭霧過朝
多雨谷口風來午易晴春酒稱觥官舍頌瓦盤送
菜客齋情不堪對鏡看雙鬢三度梅開憶帝京

元夜觀燈

上元火樹祝年豐蜿蜒龍銜萬燭紅連臂採茶歌
士女纏頭騎竹走兒童良宵月奪燈光裏大地春
浮鼓吹中莫笑山村風俗古金鳧銀燕樂應同

客中喜家叔至

兀坐閒多病相逢喜破愁何期蒼嶺路同作竹林
遊顧渚春前客嚴灘雪夜舟無遑問家事魂夢繫
松楸

又先祖龍泉學博

秉鐸先人澤經過此地偏鶯花新歲月杖履舊山
川嫁女看斑鬢添孫話隔年饑驅休共嘆厚報食

青蘊

別林弘庵

一月衙齋似閉關。連床情話破愁顏。行看開謝庭前蕙。坐對陰晴屋外山。學有淵源官自苦。吏無苛責客同閒。新詩裁共雲持贈。儉橐寧憂嶺路艱。

雨行五溪道中

朝怯春寒霧不開。濕沾芒屨踏青苔。陰移樹影連雲合。響送灘聲襍雨來。飛鳥投林驚未定。眠鷗逐浪穩無猜。長閒輪與農家樂。牛背烟簑一笛回。

過龍泉感賦

大父曾爲秉鐸師。鱣堂德澤至今貽。山川想像磨崖處。桃李追維載酒時。鶴繞三珠輝棣萼。鳳棲全樹發孫枝。欲詢四十年前事。劍水清流寄所思。

龍泉道中

霧裏穿林曳杖輕。峯巒疊疊與雲平。臨谿忽見天桃放。夾道惟聞幽鳥鳴。青玉案堆梅嶺秀。碧波琉映劍池清。千尋石壁藤蘿徑。如在龍眠佳處行。

又

懶坐肩輿道路長。閒行扶杖過高岡。千巖雨沐多奇態。百草春暄有異香。但使雲山搜歷歷。寧辭歲

月去堂。堂幽深不遇遊人賞。僻地空令勝景藏。

諸公河橋餞別

仙吏山中聚德星。客蹤偶爾泊浮萍。纔拖藤杖窮
蒼嶺。又上藍輿出翠屏。南浦銷魂杯易醉。滑城吹
雨曲難聽。柔條早拂河橋柳。總爲離人折贈青。

途中卽事

村店山橋野路岐。數家烟火接朝炊。桃花水長迷
漁艇。楊柳風輕動酒旗。鳥啼幽篴臨北岸。蝶穿黃
菜過東菑。老農自結青簑笠。檢點春耕正此時。

又

連日春流長半篙。灘頭一葉放輕舠。山逢北苑圖
難盡。石遇南宮拜亦勞。樹杪露雲微似綫。霧絲吹
雨細如毛。長年把柁妨船疾。急溜須知緩法高。

又

茆舍臨溪對夕曛。門前鷺鴨自成羣。魚梁射落灘
頭雨。米碓春殘水上雲。石落奇青危壁削。岸迷深
碧野橋分。淺春已見山花放。幽鳥調音處處聞。

重至芝城感賦

荏苒韶光三十秋。麻衣重作建城遊。黃華不改青
山色。綠鬢新添白雪愁。人去茸棠陰尚滿。客來峴

首碣長留嶺猿聲裏思親淚洒向溪頭共雨流

又

望裏樓臺倚翠微眼前人事已全非王喬萬里乘
鳧去丁令千年化鶴歸舊雨名花香自永新堤垂
柳樹成圍最憐春草堂前燕猶自銜泥繞棟飛

先君宦遊芝城距今二十餘載蕭重過此地

山川如故人物都非感念椿萱悲深風木
因成憶昔吟十章追述往事惟與嶺上猿
聲枝頭鵲血共荅此哀響耳

憶昔追隨李署時弟兄依膝樂怡怡椿萱堂上娛

斑綵蘭蕙階前獻壽卮鳧忽教趨北極鵬雲長
悔徙南池重來風木無窮憾淚咽溪流建水悲

又

祖母就養署中
伯父叔父俱至

憶昔吾翁捧檄時板輿鳩杖髮垂垂鮮辭陶侃封
題遠饌進茅容祿養隨繞膝孫曾分棗栗承顏花
萼叶墳簞卽今聽訟棠陰在猶說平反母教慈

又

憶昔東頭誦讀時鯉庭聞禮復聞詩鷄聲五夜溫

姜被草色三春詠謝池宦去龍巖貽鶴俸家兄任
清漳別

駕恩銜鳳闕媿烏私蕭備員史館
恭遇覃恩重尋燈火相師

處惆悵新鶯喚故枝

又

憶昔親迎返暑時春風錦纜日遲遲
驟鸞渡口窺明鏡玉女峯頭學畫眉
官舍恩偏寬井臼羹湯手自潔
盤匱抱孫垂白堂前婦夢繞芝城
觸舊悲

又

兄鉞生先父先母鍾愛特甚尤
勵先母早逝不及見其成立也

憶昔呱呱抱子時嬌孫鍾愛掌珠奇
寧如才望頭顱異漫識之無色笑怡
歸御犢車猶着膝老憐社飯未含飴
幔亭石上曾張宴或有仙蹤在武夷

又

親朋會集暨門墻諸
士極詩文倡和之樂

憶昔名流滿座時南樓高會放衙遲
燒殘紅燭歌初散聽徹清談飯欲糜
奇問雲亭深立雪酒依金谷各成詩
舊交零落晨星少桃李春陰賸幾枝

又

同時諸公子每至春時同遊郊
外過總鎮營下看校射走馬

憶昔看春春早時髻年伴侶出城嬉
河陽縣野名花滿驃騎軍營細柳垂
校射圃中馳玉勒打毬場上並金羈
漫嗟鶴髮人何往綠鬢重來亦有絲

又

隨侍入省寓
烏石山下

憶昔三山侍席時簪纓幕府盛追隨
紅蕉花爛揮金盃白玉盤新擘荔枝
鑿齒雕題通翡翠長蛇封

豕築鯨鯢回思舊侶同遊路烏石榕陰未改移

又先君遊武夷
有詩字刻石

憶昔登臨捧杖時雲飛出岫故遲遲黃華在望青
簾捲白鶴回看畫舫移霞燦虹橋花正放月明仙
觀笛長吹磨崖欲覓留題處愁聽春山叫子規

又先君以裁缺去任一時攀卧祖饌填塞道
路蕭今至此父老猶追思墮淚感念不忘

憶昔移官度嶺時津亭祖帳蔽旌旗寇君空灑車
前淚何武長留去後思蝶夢漆園俱是幻鶴歸遼
海不勝悲詩成已覺柔腸斷未忍頻看峴首碑

贈制府朱徽映先生

大阮風裁藻鑑留孫陽顧盼盡驊騮雕龍早識無
雙士鳴鳳今推第一流學出青藍調玉鉉麻宣黃
白卜金甌參苓儲籠梁公意濟世如君願已酬

又

龍門爭慕李膺名遠泛螺江一櫂輕荔子香中趨
玉帳刺桐花下謁牙旌投壺賭墅春樽滿長嘯登
樓海月明世講獨叨知己誼鯉庭舊有故人情

贈臬長汪舟次前輩

御屏姓字每咨詢棨戟移來駐八閩獬豸冠尊新
憲長鳳凰池重舊詞臣炎風地覺霜威肅彩筆花

生鐵案春手起瘡痕歌解網好爲霖雨上 楓宸

輓司寇馮再來年伯

德望巖廊少司寇才名宇宙大馮君點蒼山外烽
初起凝碧池頭句早聞仗節麻鞵穿間道陳情丹
旄泣慈雲如公忠孝真無媿哀詔還應念舊勲

又

吾翁患難久相依先後潛踪萬里歸九死一生憐
二老兩家百口出重圍赤城司馬乘鸞去遼海蘇
耽化鶴飛何意天涯逢令子各悲風木淚沾衣

飲林碧山榕庵同毛會侯先生何賓侯作

竹暗花明一逕疎偏於城市得幽居閒招名宿探
奇字盡典衣裳買異書樓角晚烟平檻遠湖心斜
照射窗虛纔看觸石微雲起驟雨懸空水滿除

五女出閣詩以送之兼示張倩榮懷

早歲襟盟喜結褵將迎百兩屆秋期初成金屋鸞
棲日恰值銀河鵲渡時慈訓再三須記取弱齡十
六尚嬌癡姑嫜愛惜應如女廚下羹湯好自持

又

奩鏡粧成綺閣春芙蓉花放並頭新雀屏客中乘
龍選鰲禁官慚賣犬貧膏火常同鳴杼照彩毫還

南歸草
爲書省勾燕飛早叶投懷夢歡博重幃四代人

贈僧

茆菴深結白雲中。飛錫何緣住遠公。鉢咒毒龍能
作雨。崖傳嘯虎自生風。身隨竹杖芒鞋健。心向朝
鐘暮磬空。講席我來稱上壽。木樨香裏坐涪翁。

贈錢枚一同年

亮哉陶靖節。芳徽垂千春。紛紛慕名利。濁世誰比
倫。乃今有錢子。曠懷存天真。少負瑰異才。落筆驚
鬼神。百折志不磨。逸足超凡塵。名重金臺上。蹀躞
誇騏驎。分符宰百里。遠在南海濱。地本古象郡。蜚

戶分四民。下車未三月。風俗能使淳。聲譽早騰播。
行見趨紫宸。奈何秋風起。忽思故鄉尊。簪冕棄如
屣。掉首不復親。彭澤八十日。急去羞踈踈。君今亦
如之。未肯逾一旬。皖江有魚磯。可以垂釣綸。龍山
有喬木。可以供采薪。理我籬下菊。拂我窗前筠。床
頭隔歲酒。可以留佳賓。陟園歌岵岵。無負生我人。
讀君集陶詩。字字數家珍。神理亦何貫。氣味還比
醇。芳躅紹往哲。知爲陶後身。

送表弟張衡臣省覲北上

蕭蕭木葉已辭柯。南浦消魂奈別何。爲省晨昏思

白髮獨衝霜雪渡黃河。趨庭日愛三冬暖。賜第雲
瞻五色多。我送君行頻望闕。幾年伏枕易蹉跎。

又

千樹芙蓉映碧流。征車肯爲故園留。遙知鯉對連
宵話。細數龍眠幾處秋。猿穴不教驚夜犬。鳳池豈
合問沙鷗。妙年亦共鳴珂去。夢隔寒燈竹裏樓。

又

纔把茱萸酒共傳。陽關忽奏別離筵。惠連夢入先
春草。道韞詩成欲雪天。諸令弟令姊俱有雁正南
來書易寄人。當北去月初圓。玉堂兄待斑斕舞。分

得宮香自日邊。

又

骨立憐予淚漬衣。漫將心緒報庭幃。文園別後仍
消渴。曼倩歸來亦苦饑。嶺上且看梅信近。江頭敢
戀鰕魚肥。煩君寄語東床客。春燕尋巢待啓扉。

鄉行晚宿

密樹平岡生晚烟。農家氣象識豐年。霜前屋緊苔
荊日。雨後塲光打稻天。邀客叟誇蓴熟酒。將雛鷄
滿穫餘田。村村演劇酬神願。婦女穿林夜不眠。

又

楓落寒塘菊滿籬。野人畱客草堂宜。兒童散塾迎賓揖。驚鴨還家認路岐。小摘園蔬香滿把。新炊晚飯滑流匙。漫言穀賤農猶病。常得年豐勝苦饑。

峽山道中

密篠叢篁隱碧流。隔林風送鳥聲幽。石欹古岸何年雪。楓老寒塘獨樹秋。野雉藏身穿草疾。蹇驢側耳過溪愁。山腰林外雲深處。曾訪僧居到上頭。

拜先母墓

鞠育恩深欲報難。鳳綸新捧自雲端。褒揚縱博重泉喜。菽水何如一日歡。負土路曾衝虎過。讀書夜

每聽鷄殘。今朝再拜人爭慰。轉觸悲思淚不乾。

送三姪之秦

城南韋曲古樊川。憑弔興亡不記年。夢繞芙蓉秦闕外。詩成風雪灞橋邊。交遊到定逢知己。客舍閒須理舊編。寄語幕中吳季子。相思常望素書傳。

修客學使幕

贈胡子杜武

常記過從曲巷廬。女牆高愛小樓居。亂峯影裏朝開牖。嚴柝聲中夜讀書。秋老梧桐三徑冷。月明花萼半窗虛。世交遠愧塵勞客。風雨鷄鳴夢未疎。

寄題方泰賜新居兼懷姑母

今尊博望
仍居舊宅

移居古巷近烏衣。水閣潮通白板扉。鶴在舊巢聞
子。和燕棲新壘。帶雛飛。種花春發。騷人圃。篝火宵
連大母幃。老眼江干望。帆影夢依姑。膝願多違。

孫韓穉新居同人移尊夜話

爲愛幽棲寄一枝。門無剝啄靜相宜。最多舊帙連
床置。難割名葩破凍移。兒課晚窗寒映雪。客呼尊
酒夜敲棋。招同出郭園林近。片野疎梅欲放時。

題水仙花畫卷

仙子凌波白玉姿。風流堪伴嶺頭枝。夜來展玩寒

窗下。正是詩枯酒渴時。

新柳

東風吹向曲中生。萬縷千絲拂面迎。路畔偶隨攀
折手。人間長繫別離情。新條燕剪雙綃軟。深綠鶯
流一笛輕。自傍三更衣染後。垂鞭常繞御隄行。

又

黃柏山房柳
先君手植也

野店山橋淺黛橫。茆檐斜拂酒帘輕。風將起處浪
先蹴。雨欲來時烟已生。舊植池亭逢上巳。新垂阡
隴又清明。只今人過陶潛宅。不向柴桑道姓名。

春草

野燒籠烟染大堤。東風一夜綠痕齊。長楊合獵愁
鷹眼。灞水消魂送馬蹄。日落洲前鸚鵡夢。雨昏湖
畔鷓鴣啼。閨人莫向樓頭望。天外王孫路已迷。

又

楊柳低垂碧蘚侵。秋遷庭院雨沉沉。曾鋪御路迎
雕輦。欲報春暉有寸心。公子踏來嘶玉勒。佳人拾
得賭瑤簪。惠連未覺詩情減。綠遍池塘入夢吟。

方亮虛以藍菊天竹詩索和

三徑秋英把菊枝。蔚藍天近在東籬。仙橋霜染誇
新種。瑤圃烟生吐異姿。翠壓茱萸香滿鬢。艷欺竹

葉酒盈卮。康成首唱青難出。偏有方干絕妙詞。

廣文

丁在三
首唱

又

瑤宮琪樹絳華妍。拂向雕闌火欲然。枝倚琅玕寒
亦翠。果沾霜雪潤尤鮮。櫻桃未許輕腮擘。榴子還
疑粲齒圓。却怪烏銜驚散去。丹砂狼籍點苔錢。

觀奕

一局當前萬慮空。爭先較勝意何窮。響傳深竹微
風裏。心靜寒窗細雨中。算定每因貪致失。劫成能
使敗爲功。浮雲世事多如此。今古誰論拙與工。

奉懷尤老夫子

師門立雪憶當時。簪筆追隨集鳳池。載酒每從玄晏飲。論心同切白雲思。獨傷風木三年恨。長羨耆英百歲期。爲溯淵源過茂苑。水哉軒上一題詩。夫子有詩

又

香案螭頭說鳳毛。十年清譽壓詞曹。著成永叔千秋史。揮就文通五色毫。鶴憶層陰聲自遠。馬憐瘦骨價逾高。近傳消渴歸珂里。南苑何人奪錦袍。

蘭

深谷含春早。薨罌得土微。名因湘水重。花載楚江歸。葉潤宜侵鬢。香清暗襲衣。紙窗風日暖。新雨茁芽肥。

茉莉

茉莉花當暑。繁香日滿枝。清涼新浴後。爛熳晚開時。玉鏡雙鬟。銀絲一縷垂。取宜帷幔裏。宿酒醒初知。

牡丹

繁華含夢早。富貴得春遲。露壓雲鬟重。風翻玉珮垂。蓬瀛誇異種。瑤砌讓仙姿。敢道姚黃好。天香第

一枝

芍藥

花開婪尾盛。車碾帝京塵。禁苑翻階麗。豐臺近郭春。曾看金帶艷。不數玉盂新。漫賦將離曲。尊前浪贈人。

乙亥元旦雪

彤雲旭旦結層陰。六出花飛積砌深。夢裏早朝瞻玉闕。望中春樹盡瑤林。鴉棲竹亞憐同哺。草出泥融感寸心。却喜農家占歲稔。歸田幾度聽謳吟。

祝伯兄壽卽送人都銓補

淑氣條風初度展。謝庭團聚樂天真。酒隨柏葉瑤樽滿。雪映梅花玉樹新。百歲幾逢皇覽會。一官難遇故園春。把杯斟酌增悲感。不見堂前生我人。

又

寒窗燈火憶相師。荏苒韶光易別離。險阻久迷鴻雁影。劬勞早廢蓼莪詩。扶危虎穴生兼死。急難鵠原喜復悲。回首滄桑俱往事。忽看青鬢已成絲。

又

題輿聲望出風塵。幸舍賓朋滿座春。施與忘多知性俠。紛華漸減信官貧。漫將詩酒傾同輩。欲報君

南歸草
親愛此身勲業平津猶未晚十年再命荷恩新

又

纔脫麻衣淚未乾征車又促上長安觥籌並作離筵醉枕被先愁旅夜寒鶯轉君聽遷五馬鷓鴣班我愧列千官樂耕手澤松筠在莫道分飛後會難

出門別內姪崧駿

時小兒輩受經門下

三徑春光惜別離輪君常下董生帷傳經永日兒歸後篝火深宵自讀時行飯看花芟惡草忍饒畱笋護疎籬靜中助與文思處窗外鶯啼綠樹枝

同躬玉叔過何氏墓上

雲峯疊疊水潺潺愛聽松濤鳥語閒廬指相公生白屋墓畱高士葬青山插花如向溪邊過扶醉人從隴上還曾記讀書居此地巉巖深洞日躋攀

過青山輓錢田間先生

老年著作倍辛勤玉闕虬龍忽召君身後空畱封禪草人間誰識太玄文典型當代稱遺老鈞黨先朝失舊聞回首生平知已痛青山揮涕對斜曛

渡江

潮痕初長逼春寒渡口橫舟泛紫瀾九子遙從前岸出二龍已在隔江看雲隨斷雁長空盡風送飛

帆一水寬。歷歷射蛟臺。畔樹夕陽明滅。晚烟殘。

雨中望九華山

藍輿遙指九峯行。連日衝寒滯客程。花散香臺朝雨徧。旗飄珠殿暮雲橫。每從江外瞻遙翠。偏到山中隔化城。風起松聲連萬壑。今宵應遣夢魂清。

杏花村遇雨

望裏齊山山勢嵬。曉風吹斷雁鴻哀。林光漸暝雲頭起。嵐氣全收雨腳來。禁火已知寒食近。荒村未見杏花開。高吟小杜當年句。沽酒空迎牧豎回。

過朗陵寄懷同人

何事頻爲客。春光擲等閒。短吟謝花鳥。倦眼送雲山。進退紛愁緒。逢迎總厚顏。恐教知識問。驅馬出郊關。

同躬玉叔過松譚兄舊署有感

傳經此地十年違。旅客重遊歷翠微。舊種桃花猶滿徑。手栽楊柳竟成圍。三鱣堂冷人何在。雙燕巢存主已非。爲問鄰園遊宴處。忽驚鐘磬出禪扉。鄰園今改僧舍

張公邀遊敬亭山以雨阻

欲雨衣驚薄。籠烟樹不分。霏霏簷際見。浙浙竹間聞。

聞已阻青山約空銜濁酒醺還登北樓上一望敬亭雲

登鰲峯

城隅取徑竹林幽閒步鰲峯寂上頭烟鎖萬家連霧起雨昏孤塔帶雲浮敬亭倚翠層層見宛水循溪脉脉流不用高吟搔首問臨風近指謝公樓

竹林菴

昔是幽人宅今爲老衲居燈懸春雨暗門閉晚花疎翠竹分新徑清流入故池客來尋酒蹟茶話意何如

琴溪

三月三日有小魚卽名琴魚

琴高仙跡指丹臺白石長存碧水迴一自清溪乘鯉去至今春漲有魚來草迷洞口留雲護花滿鱸邊帶雨開山鳥聲聲多異響恍疑鸞鶴下蓬萊

新路口號

大賈捐資開修可免新嶺崎嶇之苦

行李人嗟嶺路崎五丁開道履平夷移山莫笑愚公妄但得黃金山可移

新安喜晤學博耿仕可同門

幾度春明盼遠天素心曾託雁書傳爲沾祿養登臯席懶逐風塵問錦韉扶杖故人來嶺外挑燈舊

南歸草
雨話尊前。回思立雪師門日。華髮俄驚十九年。

和韻答周麟聲先生

百花三徑誦詩新。

先生有百花三徑諸什

卓犖風流迥絕倫。

白社肯爲逃世叟。青山空老著書人。愛蓮一任堦

生草。顧曲頻教客飲醇。莫謂雄文無賞識。子雲名

早在丹宸。

客中偶吟

雨霽風柔綠柳甦。黃鶯啼滑燕呢喃。櫻桃未熟禽
先伺。芍藥將開蝶屢探。病戒詩魔聊遂懶。愁憑酒
聖易成醺。客中無事貪朝睡。乍聽書聲覺自慚。

久雨欲遊黃山不得。讀錢方兩先生遊記有

作

黃山奇洩鬼神秘。我心嚮往無由至。偶來訪友過
新安。急商遊政携筇屐。復遇良朋賈興豪。淫雨兼
旬無日霽。街頭水滿春泥渾。庭除石滑苔錢膩。亦
知溪險漲難前。童僕阻撓心意遂。借觀山志當臥
遊。快讀方錢兩公記。康樂冥搜饒勝情。柳州落筆
態橫生。寫來曲折盡幽致。亦復井次心眼明。恍聽
溪風禱雨至。乍疑泉瀑奔雷鳴。斷壁無垠拔地起。
懸崖欲落隨天傾。古松根不藉寸土。擎空穿竇枝

交撐斧劈無痕運神巧日月不定分陰晴黃海變
幻呈異象白猿時學山僧行鼎湖龍去神鴉在浮
丘招手携容成左挾匡廬右天目江湖襟帶雲烟
橫豈有此理語特妙到者方知堪一笑朝川片石
難貌成南宮再拜應傾倒勝地名文相與傳津梁
後學爲先導開卷一覽使人驚掩帙長思發狂叫
眼底足下神魂飛此身已覺窮微與向子空圖五
嶽懸漁人何處覓桃源化城當前未深閉雪夜偏
回剡水船夢遊天姥識宮闕前身合是丹臺仙此
情難向俗人說畱與他時續舊緣

錢歐舫表兄以修族譜寓淳之蔗川手書見

訊賦寄

青溪一櫂御風徐忽漫淹畱且寓居客裏悶兼連
日雨閒中喜得故人書夢回鶯谷花飛後倦起鳩
坑茗戰初異地萍逢還阻越思君不見轉愁予

又

賭酒敲枰憶帝鄉別來風木黯然傷爭言無忌才
相似長灑羊曇淚幾行詩味侵梅過庾嶺筆潮吞
海渡錢塘嚴陵弔古多高興故態狂知老更狂
鮑覺庭貽青溪先正詩刻賦謝

龍泉篋底埋寶氣燭霄碧和玉璞中藏精輝媚山
澤大雅維乾坤鬼神默護惜廣陵苦知希幽芳灑
鵲血所期後起人自任斯道責鮑君天下才青溪
秉鐸席乃悲先賢文兵燹棄瓦礫斷簡勤搜羅手
鈔脫腕力殺青播海內元音闕復作白日照青燐
寒光豈終匿朱穆有遺書中郎獨編輯昌黎文未
傳歐陽能辨識草玄在人間復有子雲出千載接
心傳相待若朝夕我來挹清芬討論窮今昔手授
琅瑤函披對景往哲浮白發高吟舉頭落山川

徐廸功世兄惠鳩茗賦謝

春風晴颺遊絲罥紅雨簷前蹴雙燕客舍聽殘杜
宇聲掩帙香消愁午倦徐郎贈我鳩坑茶紫英萱
帶霜花片呼僮急煮蟹眼泉雀舌龍團休茗戰連
朝酪酊思六班滌煩安足誇陽羨聞君家住青溪
頭松坪竹塢深且幽世傳清白鮮長物石田數畝
秋無收梅花峯下種瑤草驚雷雨後春芽早陰崖
陽坡土燥濕霧海雲窩日昏曉玉甲銀刀摘取微
竹床石竈爐烟小箬籠封題遠寄將琉璃波浸春
蘭香陸羽經傳盧椀美感君意如茶味長龍眼深
處藏茅屋開雲斲玉旗槍綠年年作客向天涯雪

濤雷英迷空谷越中佳茗人爭貽方山日鑄顧渚
奇鳩坑差與龍眠似瓊芳灑露醒詩脾擎甌忽起
故園思紫笋研膏正好時

過穀臣宗姪齋頭

晴日尋芳古渡頭小廬深處徑偏幽一溪碧水都
迎戶兩岸青山盡入樓鶯燕交飛花歷落琴棋傳
響客淹留烹泉更進盧仝碗宿酒連宵頓減愁

舟中送趙安侯之天台

淹留深渡快新晴雨後青山兩岸迎孤雁分飛雲
外影扁舟送別客中情重過嚴灘乘潮便更向天

台采藥行爲語好賢宗太守不須彈鋏旅懷傾

過嚴陵有懷

客○臆○曾○此○歷○朝○昏○復○駕○扁○舟○過○郡○門○雨○後○山○添○新○
黛○色○春○來○溪○沒○舊○潮○痕○雲○迷○秦○樹○難○逢○雁○月○照○嚴○
灘○獨○舉○尊○更○值○故○人○兼○攝○去○呼○噤○天○半○望○華○軒○

自衢州過江右途中雜咏

計四首

又問三衢路還牽百丈船亂流無故道平岸得遙
天布穀啼山樹秧針刺水田夕陽蛙閣閣旅枕總
難眠

又

入夏何曾霽。披衣竟似秋。密雲低遠岫。急雨逆孤舟。蓬漏還侵枕。杯傾莫破愁。浣花詩一卷。終日誦無休。

又

天塹舟車繹。清時戰伐經。斬鯨波早靜。歸馬草長青。上相能籌幄。功臣合繪形。隔溪懸網處。傳說五侯鯖。

又訪友不值

永日風兼雨。蕭蕭向水濱。路難偏上瀨。天遠不逢人。蜿蜒山相顧。飛鳴鳥若親。遣懷頻得句。未覺客

囊貧

又

篷窗貪午睡。忽覺日將晡。雨勢暗林莽。鳥聲悽鷓鴣。天隨層嶂遠。雲逐片帆孤。遙見村帘出。維舟問酒壚。

又

荒郊皆草莽。小邑半丘墟。鹽米河邊市。菰蒲水上居。大官停畫戟。旅客借蘆廬。匠手徵丹堊。將無物力紓。

又

涼風吹短棹。久雨快新晴。花鴨沿溪浴。菱鷄徧野鳴。日斜疎樹出雲淨。晚峯明遙指前途去。那堪獨眺情。

又

村烟籠樹密。野照接籬荒。苦蕒挑偏綠。甜瓜嚼亦香。自來魚入罾。不住水春糧。林下忘機叟。應憐過客忙。

又

誰家結茆舍。占此好林泉。犬吠竹籬外。鷄鳴桑樹顛。榴花紅灼灼。荷葉綠田田。雨霽禾初長。今秋卜

有年

又

淺碧澄清瀨。遙空映翠微。潭魚迎溜上。水鳥貼波飛。倦卽欹高枕。晴纔換袷衣。樹根權繫纜。停午綠陰圍。

又

捨舟窮水驛。登陸陟山坡。虹跨珠泉落。峯明玉斗嵯。桑麻人力作。商賈貨肩摩。自笑緣何事。相從襍運過。

又

入市門羅雀。當街豎牧牛。民殘無屋宇。官冷對田疇。關隘分龍脊。帆檣集馬頭。涓涓玉溪水。又送出江舟。

又

一水拖寒練。羣峯列畫圖。野花垂岸發。山鳥隔林呼。吹笛傳仙子。臨風憶藐姑。望中葱鬱處。指點是鵲湖。

又

隨侍經過地。重來三十秋。風猶青雀舫。月在白蘋洲。歡笑成今夢。淒清異昔遊。無情江上水。東逝自

悠悠

又

柝猶傳古戍。鷄早唱深林。柔櫓枕邊發。殘星波外沉。事過寧用悔。夢斷不須尋。養氣時調息。朝來戒苦吟。

又

雲樹隱蒼蒼。河干集晚檣。繁星亂漁火。遠水接天光。隔舫詩歌近。登床笛韻長。推篷看夜色。不覺露深涼。

又

崖倒澄潭影。蘿牽曲磴陰。奔騰驚虎踞。空響應龍吟。墓指豐碑矗。臺迷講院深。無關興廢感。僧磬出雲林。

又

阡陌村居接。林巒野望遙。雉生驚草疾。魚暖戲波跳。久雨墜梅子。平沙抽蔗苗。將雛巢幕燕。漸引向烟霄。

又

阿叔敲棋局。清談共惠連。熱愁篷似火。閒遣日如年。侯仗牛亭吏。懸旌鵠舫仙。柴桑千古士。消領北

窗眠

又

競渡龍舟戲。江邊鼓吹譁。市門懸艾葉。村鬢見榴花。客覓蒲觴醉。兒憐綵縷斜。蹉跎逢令節。兩度在天涯。

龍舟曲

桂檝蘭橈繫綵縑。江頭風雨正廉纖。一聲簫鼓中流發。十里朱樓捲畫簾。

又

翡翠珠鈿壓畫樓。憑欄看取奪標舟。無端激賞齊

喧笑博得遊人盡轉頭

遇臧喟亭侍御卽爲廬山之遊賦贈

東觀西臺劍佩隨何期相遇客江湄民艱采入宣
公劄勝景供吟杜老詩湖泛烟波初霽後舟移蘭
蕙正開時買蘭載歸十年不負匡廬約驄馬休令野鶴
知

合肥相國李太夫子廬墓白燕詩

王母鸞輶月殿歸瑤筐雙燕影依依投懷早叶燕
公瑞繞墓還同鶴侶飛陶母墓上雙白鶴來弔相業昇平通
白雉孝思純潔感烏衣綸扉玉署清如許素羽將

雛入紫微

又

星輝金斗散瑤光瑞表靈禽遶墓傍羽化忽驚飄
夜雪鵝成容易感秋霜雲軒紉引霓裳舞隴樹花
銜玉剪香爭獻詩歌傳盛事采風應續白華章

秋日同內人看荷小飲

涼颼欲動暑氛過偶出憑闌看晚荷翠蓋花畱新
艷好紉房子結苦心多瀛洲此去承恩賞水閣何
年把臂歌爲取碧筒揀一醉不教白首負烟波
得伯兄書寄懷聞有易州之行

鷄肋功名願莫酬一官仍守積薪愁
半年夢去依京闕兩使書來自濟州
僕病代籌參朮費田荒難爲稻梁謀
憑高弔古過燕趙珍重寒風易水秋

望天柱

衆峯羅列俯兒孫絕巘天開控海門
鶴舞龍蟠尊砥柱錫飛花散闢祇園
雲纔出岫嵐光合鳥欲歸林樹影昏
古洞藤蘿傳勝景勞人百里未攀捫

田家卽事

秋成已擬慶盈寧枝節無端起騰螟
禾災農家謂之枝節稻
爲傷虫抽穗白禾猶經雨報椿青
嘴穗虫報椿皆農家語也

鴉登牛背行荒隴鷺立魚梁狎遠汀
見說湖庄差較好江潮初退露圩町

又

紫艷秋花滿樹垂短墻栽槿自成籬
匏瓜種蓄輪囷老蔬葉文成篆籀奇
兒取鮮魚持籠去婦春生稻帶芒
炊木棉地裏村姑返布笠傾欹理鬢絲

張次臯擢平山令

卓異專城印綬垂黃鶯新囀最高枝
名花百里聲初起小草三遷遇已遲
民隱久爲循吏悉官箴早荷聖君知
一門清貴鳴珂盛會看青驄傍風池

樊口大風

風響高林淡夕暉。白頭浪起拍漁磯。深深柳岸羣
鴉亂。渺渺江天一鷺飛。斷港迎潮罾網密。高田無
雨豆苗稀。怪他小艇輕如葉。傍晚人爭趁渡歸。

寄答隨齋學士

雲霄人獨憶巖阿。招我殷勤錦字多。遊豈救貧原
汗漫。性非慵宦却蹉跎。楚江木落魚吹浪。燕塞風
高雁渡河。曾寫秋懷憑大阮。夢隨明月過滹沱。

贈王子喜先生

太傅門牆日侍隨。樓高花萼拜君遲。驂騑千里無

雙轡。驃騎連營第五奇。益信文貞傳世業。常從錢
起誦新詩。才人偏怪能兼美。到處甘棠載口碑。

贈馮繁陽先生

瀛洲彩筆著鴻文。更控花驄傍五雲。上殿共推真
御史。建牙爭頌大馮君。鳳凰山重鸞坡客。庚癸呼
消甲帳軍。漢水安瀾多稔歲。久知霖雨遍江濱。

漢陽同張壽民感賦

壽民爲東海
夫子令坦

十載專城著令名。河陽花滿待遷鶯。一江烟月鶴
秋唳。萬井樓臺鷄午鳴。人倚玉峯稱玉潤。客從冰
署憶冰清。泰山梁木應同恨。漢水悠悠空復情。

文石濤簡討侍母夫人旋里

陳情將母錦衣旋黃鵠磯頭暫泊船丹井果思紅
橘美秋江饌進白魚鮮饑同曼倩偏能養米餽烏
程豈受隣近指洞庭湖水濶片帆歸去羨登仙

遇張景峯侍講畱飲看菊

鄂渚逢君話勝遊烟霞都向錦囊收太和絕險穿
雙屨廬嶽遙青盪小舟柳暗重尋陶令宅月明還
上庾公樓輜軒乘暇耽幽賞縱爲饑驅豈解愁

又

立雪那堪憶昔年淚枯風木各淒然情濃似酒愁

難醉人淡於花影共憐自別鵷鸞成遠夢又逢鴻
雁在遙天登高且學龍山會莫遣霜華入鬢邊

九日

三秋獨向漢川來辜負東籬菊自開門掩寓齋誰
送酒地鄰鄉國怯登臺南天雲去孤雛遠北極霜
寒一雁哀落帽不堪看短簷杖頭聊醉客中杯

重九後一日文石濤招同張景峯前輩登黃

鶴樓

閒遊勝地領秋光好友招携共舉觴隔日也能酬
令節登高何必定重陽

先約重九景
峯展大日

千林霜信天

蕭爽萬里江流氣森茫此際客懷差不惡醉歌休
負菊花黃

又

嚴城古堞倚丹梯絕頂登臨望眼迷危檻欲隨流
水動飛甍直與白雲齊魚吹細浪芳洲遠帆挂遙
天樹影低吳楚風烟憑指點長江近接海門西

又仙棗亭石鏡臺黃梁祠
尚存湧月臺曹孟德題

跨鶴飛來海外仙棗亭石鏡至今傳吹殘玉笛樓
中曲喚醒黃梁夢裏天月湧高臺空戰壘洲迷芳
草付平川輪他崔顥詩名在閣筆才人亦偶然

又

十里牙檣漢口舟連雲疏綺市烟稠秋林映帶晴
川外小艇橫斜古渡頭木落洞庭思遠信時大兒有歸信
雁來衡浦動鄉愁憑闌不盡遊人興點點昏鴉集
戍樓

鄂城懷古和友人韻

益州天半火雲橫地控荆門此戰爭堤柳已迷陶
侃宅江湖空打呂蒙城月明烏鵲驚餘焰風起鯨
鯢作壯聲長得鎮南如杜預盡驅耕犢答昇平
兒鈇自永平歸相遇漢口話滇南山川風景

得詩十首兼憶兒鎰

一 銑由陸路長驅
途中凡三閱月

還家首道早秋天直至秋殘遇漢川鳥翼雲迷千
疊險馬頭月見幾迴圓晨昏在念應忘倦枕被關
情劇可憐對汝更教思汝弟孤踪天外倍凄然

又 迤西路較迤東爲更險水多洑流赴金沙
江鐵索橋凡數見大姚河在姚安栗岡弟
爲姚安太守
去永甚近

迤西鳥道倍嵯峨怯聽輶輶喚奈何江湫金沙頻
折轉橋懸鐵索屢經過斗牛叩笮行非遠山海齊
諧怪未多却訝竹林遊宦地雙旌同指大姚河

又

果下馬猴牛皆滇產牛負載行山上望之
如蟻喫栴榔防瘴紅米甚香不可多餐霧
至便雨雨
過卽晴

巉巖金碧映朝暉倒挂虬松樹十圍果馬似龍過
嶺健爆牛如蟻入雲微栴榔霞嚼顏常醉紅粟香
餐腹易饑忽見霧絲沾袖濕深林權避雨霏霏

又

普兒茶甚佳柳子漿濃香如酒所謂酒樹
者當卽此也羅漢松飛子可食苦提珠紅
者爲上取孔雀尾不令回顧顧則毛無光
彩蟒蛇膽不易得必索蛇生取鸚鵡多能
語

普茗龍團笑酪奴柳漿如酒不須沽松多羅漢飛
仙粒樹種菩提結火珠孔雀有毛空顧尾蟒蛇因

膽却亡軀雕籠鸚鵡都能語寧數琵琶響板呼

又四山多風滇風黔雨常是星躔箕畢也四時無寒暑雨至便涼樂俗歲時鳴鐘聚會以冬至日為歲首六月廿四日為星迴節

血食不舉火先大人滇行集載之甚詳燒火深菁祀蠱以求財山多毒泉上鑊碑石此即武侯所謂不毛之地也

吹萬號空風好滇陰晴無定暑寒偏歲逢日至鳴鐘會節祀星迴啖血鮮蠱火穿林光黯黯毒泉封石滴涓涓不毛何用歸圖版終古荒域外天

又居宇荒陋田園磽瘠寶石產緬甸價甚貴璞內有無大小皆不可定永舊有金戶逃亡殆盡用小錢衣襖不事蠶桑木棉婦織絕少庭訟亦稀

虎狼跡印短籬通鷄犬聲稀瘠土窮寶購千緡礪

石碎金通三戶鑿山空錢多驚眼充官稅龜畏牛毛少婦工但喜訟庭閒可臥醇風差與葛天同

又甲寅之變先大人陷於賊先慈隨任以憂卒於滇省忽忽二十年矣鎭至復設經識追薦遙聯慈雲不勝悲愴

風捲昆池晝霧昏燕巢無復舊朱門劫灰冷後青
燐滿遺鏃收來白骨存峒獠尚虔諸葛祀夜郎纔
識漢廷尊廿年淚灑傷心處剪紙重招大母魂

又吾家自先大叅公至鎭凡四宦於滇

栽花偏使向蠶叢錯節能收利器功入洛年休輕
賈誼棄繻志合效終童恩加瘡痍寧寬恕法到窮

荒有變通幾代甘棠多祖澤好承遺愛振家風

又鍾舉子即名典與頗聰慧

生來何事不知歡萬里馳驅爲一官纔出門庭經險遠須從宦路識艱難春回嶺外鶯聲早秋入江南雁影寒近喜雛孫初學語含飴抱指彩雲端

又

索米修齡嘆苦饑秋殘猶滯楚江湄音書盼遠雙眸斷婚嫁催人兩鬢知金馬關頭雲望闕鳳凰山外夢歸池趨朝定及梅花候早寄春風嶺上枝

第四女出閣予嫁累已畢時客楚不得歸寄

詩二首遣之

向平多女迫經營今汝于歸累已輕鸞鏡喜看雙鳳影燕巢難別衆雛情眼昏鍼線憐慈母心念粧奩仗阿兄時大兄自滇馳歸莫怪老夫遊未返饑驅都爲爾曹行

又

從今井臼學操持壺教和柔婦所宜琴瑟靜偕佳壻好羹湯勤奉老翁衰堂上惟老翁年已七十荆釵性合齊梁案柳絮才堪佐董帷笑我將詩頻送女也應吟白鏡中髭年來諸女出閣皆易以詩

過漢陽訪吳雨巖同年留宿夜話感賦

思君偶詣晴川閣，遲我同過黃鶴樓。
淅淅雨聯深夜榻，颼颼風阻隔江舟。
難從市上尋屠狗，欲向墻東學儉牛。
作客自嗟生計拙，吟殘霜葉楚天秋。

孫倬菴留飲齋頭遇雨

盈盈一水隔江東，渡口乘舟偶御風。
敲戶客來喧市裏，披帷人在靜香中。
吟深雪案生虛白，嘯起霜林帶落紅。
投轄恰逢寒夜雨，芳樽爛熳興無窮。

席間卽事

爭道蓮花似六郎，花憐解語滑鶯吭。
清歌一曲腸

堪斷更倚風前唱麗娘

又

露冷霜高月影沉，江邊一笛響秋林。
只愁驚起樓頭鶴，跨向瑤池沒處尋。

陽羅拜先叔岱麓中丞墓

平生父執最情真，遙拜豐碑一愴神。
蒿里風光泉下月，錦城勲業夢中春。
夫人智築襄陽壘，夫人歸時楚有

小公子誠通灝瀨津。

涉汝扶

概下映何事雁行中，斷早玉

樓先我白頭親

過赤壁

赤壁周遭湖水連山川亦幸有良緣千秋奇賞才
人重兩賦高文勝地傳秋夜舫歌猶嫋嫋雪堂燁
影自娟娟風流太守留樽酒媿說塵勞客是仙賈太
守留飲

早行

宿鳥驚飛葉亂翻行人乞火到柴門嚴霜欺雪天
光霽凍井生烟水氣溫雨後平疇滋菜麥年豐隨
處散鷄豚老翁無事偏朝起獨坐籬根背負暄

投宿

斜陽村落指前岑木葉蕭蕭入望深天色傲霜寒

日淡山光凝照暮烟沉愁聞征雁迷遙浦愛見歸
鴉集晚林野老不知塵世事但爲行客課晴陰

將入都別內

余乞假歸省內人實贊成之

冒雪同歸逼歲闌衝風我又向長安南飛雙燕心
忘倦北去孤鴻影倍寒寸草含春瞻日近枯楊吹
雨泣雲殘回思賴爾成予志猶幸陳情恨少寬

又

朝天重踏軟紅塵早夜寒暄孰與親未忍別離憐
爾病豈辭辛苦慮子貧夢繁朔雪南雲遠人老男
婚女嫁頻君父恩深思欲報他時待訪鹿門春

夢先大人談往事

繞膝歡從夢裏尋風聲猶怯鼓聲音死生友痛稽
康散骨月人悲子敬琴栗里精神歸隱計花谿心
血亂離吟最傷我母先辭世十九年來病已深

拜別大人厝屋

丹詔頻催入鳳池庭幃回首不勝悲還家但得衰
顏見去國惟依淺土辭馭叱王尊恩欲報檄慙毛
義養全虧一坏待卜牛眠地再表陳情未敢遲

別叔父

猶記東頭共讀時韶華荏苒鬢成絲雪霜已萎萱

花蒂風雨頻摧荆樹枝夷簡才名慙獎許向平婚
嫁遂心期歸朝親舊應相問爲寄黃山一卷詩

親友祖餞留別

河橋惜別送征車祖帳何勞動里閭媿說登仙同
景倩還言題柱待相如馬嘶古道聲偏急雁去遙
天影漸疎官閣早梅春已近平安應報故人書

大關留別弟姪

連鑣並轡遠追隨北峽關頭月上時相勸喜傾鄉
國酒此行不唱渭城詩燭燒茅舍聯宵話雲近松
丘繫夢思說送燕公剛十載步塵慙媿後車遲

示大兒三姪

時大兒自滇歸有詩一卷

洱海初歸萬里身。清羸翻喜健風塵。吞來七澤胸無滓。踏遍千山句有神。勛業只須乘少壯。年華容易送因循。惠連好共荆扉掩。莫負池塘草色新。

遇雪

踏遍冰霜逼歲闌。十年幾度向長安。每逢朔雪行偏遠。回念公車意較寬。玉樹梅含官閣早。鶯花春近上林看。此心已捧紅雲日。曉起披衣未覺寒。

別最古園

陶潛歸後憇東籬。三徑初成五柳垂。竹裏醉扶鳩

杖處。花前春奉板輿時。朝開小閣禽鳴桁。夜坐高樓月滿枝。夢化蝶飛魂化鶴。不堪重問習家池。

別泳園

命兒輩讀書園中

西郊小築近扶筇。自媿塵勞徑欲封。雪練一條朝雨驟。琅玕千尺晚烟濃。亭依疎樹登孤嶼。檻俯高城望遠峯。松石莫荒思祖澤。且辭剝啄足三冬。

別三弟六弟兼憶大兄四弟客京師

朔風吹處暮雲平。愁聽離羣旅雁聲。故國棣華初入夢。他鄉枕被久關情。芸窗夜未聞鷄舞。杏苑花時導馬行。別後定多詩憶我。漸看春草謝池生。

別兩幼弟兼示表弟吳天乘

時受經門下

鳴臯鶴去碧山岑委棄羣雛少和音阿季汝依慈
母膝師祺余識老人心龍門史在承遺澤駒齒年
新惜寸陰好侍絳紗同穉弟一庭芳草閉門深

懷四弟敏仲

遊興詩名兩越聞饑驅先後惜離羣拏舟我泛嚴
灘月曳杖君辭雁蕩雲欲碎胡琴來闕下早登講
席重河汾伯兄旅寓溫姜被待和吹篴復和埧

懷內弟近修客秦中

秦漢山河半夕陽廢宮無處問長楊書生可慣騎

官馬弱體偏教犯塞霜萱樹雲遙瞻故國刀環月
冷夢空房最憐奉倩多情種莫向天涯苦悼亡

冬至日喜晴

千林寒色曉霜清客路欣逢冬至晴星指斗杓天
上轉律吹葭管地中生庭花愛日空留景宮樹含
暉早向榮照耀山川旌旆過陽春好爲答輿情

時無
之任

過臨淮寄懷馬伯逢

扶風鐸席古濠邊一再銜恩此地偏弟子重趨新
絳帳先生仍擁舊青氊春知花徑多佳詠寒憶芸

窗有和篇我駕星輶渡淮水相思難覓雁書傳

晚至徐州

千里山川抱郭來夕陽遙見塔崔嵬白遮遠隴羊
羣下黑蔽高林鳥陣迴河水有聲水未合村煙乍
捲樹全開英雄霸業銷沉盡荒草難尋戲馬臺

渡河

旅夜鷄鳴月影朦早謀舟楫濟川功馬嘶古岸水
霜外人語荒臺烟霧中河水紅先迎曉日柳條綠
漸受春風江南別去家千里地近雲山究郡東

趙泊口至雄縣感賦

河落桑乾凍欲平曉霜殘雪映來明路疑銀漢天
邊去人曳冰車鏡上行暫避灰塵開眼亮乍看魚
藻覺心清棠陰十里雄山近今日重過感倍生

又

先君令雄時植柳築堤請罷狐皮檄
驅渾龍善政甚多百姓至今感之

來往頻經憶昔年姚公橋畔草芊芊幾圍垂柳過
高堡百丈長隄障巨川狐腋罷輸民在野渾龍驅
去秣盈田相逢父老猶歌泣雞黍遮余到馬前

弟膚功敏仲

校

男孔鉞升初

明治二十九年於東郡禮之

花見南散人

行間墨點不知何人之筆